


樂城集

六之十



漢書門			
三	四	六	四
九	六	四	類
一	二	六	架
五	冊	函	冊

內閣文庫			
三	四	六	漢
五	一	六	書
函	九	四	類
二	冊	號	架
冊	冊	號	架

內閣文庫			
番號	漢	3464	
冊數	15	( 3 )	
函號	315	95	



Kodak Gray Scale


A 1 2 3 4 5 6 M 8 9 10 11 12 13 14 15 B 17 18 19



© Kodak, 2007 TM: Kodak







樂城集卷之六

淺草文庫


宋 西蜀蘇轍子由著

明 東吳王執禮子敬校

詩一百首

題張安道樂全堂

今日無不全人事每自傷譬如摩尼珠宛轉有餘光  
蘇軾不能加塵垢豈有亡世人未嘗識姑射手自將  
我公體自然率性非勉強馳驅四十年不入憂患場  
晚歲事蒙養歛退就此堂小儒豈知道宿昔窺門牆  
申屠師無人無足亦自忘如逢鄭執政一笑先生傍





和鮮于子駿益昌官舍八詠

桐軒

桐身青琅玕桐葉蒲葵扇落落出軒墀亭亭奉閒燕  
 夜聲疎雨滴午影微風轉秋飈一凌亂浙瀝驚葱蒨  
 朝日失繁陰青苔覆遺片空使坐中人慨然嗟物變

竹軒

幽軒離紛華惟有一叢竹纖梢起餘寒紫筍散輕馥  
 擢幹春雨餘挺節秋霜足不知歲時改守此娟娟綠  
 上有吟風蟬空腹未嘗食翦伐非所辭不受塵土辱

栢軒

築室城市間移栢南澗底山林夙所尚封植聊自寄  
 崎嶇脫巖石擁塞出焚翳上承清露滋下受寒泉惠  
 秋來采霜葉咀嚼有餘味苦澁未須嫌愈久甘如薺

巽堂

山前三秦道車馬不遑息日出紅塵生不見青山色  
 峰巒未嘗改往意自奔迫誰言幽堂居近在使者宅  
 俯聽辨江聲却立睨石壁藤蘿自太古松竹列新植  
 暑簟臥清風寒樽對佳客試問東行人誰能同此適

山齋

平地厭喧囂虛齋上山足蕭條遠城市坡陁富林麓



簡書日填委杖屨每幽獨豈無山中士高臥白茅屋  
逢人默無語長嘯響巖谷此室庶可招夜月相從宿

閑燕亭

登山稍已高曠望良亦遠危亭在山腹物景行自變  
諸峰宿露收草木朝陽絢盎盎雲出山溜溜泉垂坂  
徐行得佳處永日遂忘返此樂只自知傍人任嫌懶

會景亭

亭高衆山下勝勢不自收岡巒向眼盡風籟與耳謀  
鳶飛半嶺息雲起當空遊視身如乘風超然忘百憂  
春歸室中居唯見窓戶幽視聽隨物變恍誰識其由

寶峰亭

昔過益昌城莫登君子堂駕言念長道未暇升崇岡  
今聞寶峰上縹緲陵朝陽三休引蘿蔓一覽窮蒼茫  
微雲靄雙劍落日明故鄉奔馳迹未安山藪意自長  
漂搖萬里外手把新詩章宦遊不忘歸何異鳥欲翔  
塵土汗顏面年華侵鬢霜何時首歸路所至聊徬徨  
樽俎逢故人亭榭凝清光爲我具斗酒宿恨猶可償  
次韻分司南京李誠之待制求酒二首

世上升沉都夢裏春來疆健鬪樽前公田種秫全拋  
却坐客無羶誰與錢



春深風雨半相和節物令人意緒多中酒何須問賢  
聖和詩今尚許羊何

送施歷城辯歸常州

高人不受塵土侵三年浙江藏何深久閑物理有相  
復歷城官事森成林乘時歛散逐十二鞭撻逋負徒  
哀矜一杯相屬未嘗得百畝歸去將安能潛逃雖出  
知者後黽勉尚見仁人心歸期忽告三月尾強留不  
顧千黃金河豚雖過鱸鯪在粳稻正插風雨淫酒肴  
勞苦罄隣里期會迫隘思僚朋山川吳越我所愛扁  
舟佗日要追尋滯留未用便相詫半年歲月行駸駸

施君既去復以事還戲贈

令尹西行去又迴西湖重把舊樽壘吏民再見雞棲  
乘猶道吾公挽不來

和文與可洋州園亭三十詠

湖橋

湖南堂宇深湖北林亭遠不作過湖橋兩處那相見

橫湖

湖裏種荷花湖邊種楊柳何處渡橋人問是人間否

書軒

綠竹覆清渠塵心日日疎使君遺癖在苦要讀文書



冰池

水深冰亦厚滉蕩鋪寒玉好在水中魚何愁池上鷺

竹塢

空陂放修竹蕭蕭復真真莫除塢外筍從使入園生

荻浦

離披寒露下蕭索微風觸摧折有餘青從橫未須束

蓼嶼

風高蓮欲衰霜重蓼初發會使此池中秋芳未嘗歇

望雲樓

雲生如涌泉雲散如翻水百變一凭欄悠悠定誰使

天漢臺

臺高天漢近匹練掛林端秋深霜露重誰見落西山

待月臺

夜色何蒼蒼月明久未上不上倚城臺無奈東南嶂

二樂榭

動靜惟所遇仁智亦偶然誰見二物外猶有天地全

灑泉亭

泉來草木滋泉去池塘滿委曲到庭除清冷備晨盥

吏隱亭

隱居亦非難欲少求易遂有意未成歸聊就茅簷試



霜筠亭

林高日氣薄竹色淨如水寂歷斷人聲時有鳴禽起

無言亭

處世欲無言事至或未可唯有此亭空燕坐聊從我

露香亭

重露覆千花繁香凝畦圃不忍日將晞散逐微風去

涵虛亭

虛亭面疎篁窈窕衆景聚更與坐中人行尋望來處

溪光亭

溪亭新雨餘秋色明澗漾鳥渡夕陽中魚行白石上

過溪亭

溪淺復通橋過者猶恨懶賴有沙上鷗常爲獨遊伴

披錦亭

春晚百花齊綵綵巧如織細雨洗還明輕風卷無迹

禊亭

觴流無定處客醉醒還酌毋令仲御歌空使人驚愕

菡萏軒

開花濁水中抱性一何絜朱檻月明時清香爲誰發

茶蘼洞

猗猗翠蔓長藹藹繁香足綺席墮殘英芳樽漬餘馥



箕筥谷

誰言使君貧已用谷量竹盈谷萬萬竿何曾一竿曲

寒蘆港

蘆深可藏人下有扁舟泊正似洞庭風日莫孤帆落

野人廬

野人三四家桑麻足生意試與叩柴荆言辭應有味

此君庵

風梢遶簷匝霜幹當窓淨遙知素壁上醉墨森相映

與可墨竹冠絕今世

金橙逕

葉如石楠堅實比霜栢大穿逕得新苞令公憶鱸膾

南園

官是勸農官種桑亦其所安得陌上人隔葉攀條語

北園

使君羨且仁遍地種桃李豈獨放春花行看食秋子

次韻吳興李行中秀才見寄并求醉眠亭詩二

首

才堪簿領更無餘贏得十年閑讀書寵辱何須身自

試窮愁不待酒驅除故人歸去無消息佳句新來屢

卷舒前日使君今在此不妨時復置雙魚

李公擇自吳興移齊南



右和見寄

是非一醉了無餘唯有胃中萬卷書已把人生比蘧  
傳更將江浦作階除欲眠賓客從教去倒臥鸚鵡豈  
暇舒京洛舊遊真夢裏秋風無復憶鱸魚

右醉眠亭

和子瞻玉盤盂二首

東武蘇公家園中千葉  
白芍藥子瞻新爲此名

千葉團團一尺餘楊州絕品舊應無賞傳  
莒國遷鍾虞移憶胡僧置鉢盂叢底留連  
傾鑿落餅中捧擁照浮屠強將絳蠟封  
紅萼憔悴無言損玉膚故相林亭父老  
知出羣草木尚何疑無多產業殘花

藥幾許功名舊鼎爨豐艷不知人世別佳名  
新換使君詩明年會看花尤好剝盡浮苞養一枝

寄題密州新作快哉亭二首

車騎崩騰送客來奔河斷岸首頻回鑿成戶牖功無  
幾放出江湖眼一開景物爲公爭自致登臨約我共  
追陪自矜新作超然賦更擬蘭臺誦快哉

檻前濰水去云洲渚蒼茫煙柳勻萬里忽驚非故  
國一樽聊復對行人謝安未厭頻攜妓汲黯猶須臥  
理民試問沙囊無處所于今信怯定非真

贈馬正卿秀才



男兒生可憐赤手空腹無一錢死喪三世委平地骨  
肉不得歸黃泉徒行乞丐買墳墓冠幘破敗衣履穿  
矯然未肯妄求取耻以不義藏其先辛勤直使行路  
泣六親不信相尤愆問人何罪窮至此人不敢尤其  
怨天孝慈未省鬼神惡兄弟寧有木石頑善人自古  
有不遇力行不廢良謂賢

答文與可以六言詩相示因道濟南事作十首  
遠遊既爲東魯遷居又愛南山齒髮自知將老心懷  
且欲偷安

舜井溢流陌上歷山近在城頭羈旅三年忘去故園

何日歸休

野步西湖綠縹晴登北渚煙絲蒲蓮自可供腹魚蟹  
何嘗要錢

飲酒方橋夜月釣魚畫舫秋風冉冉荷香不斷悠悠  
水面無窮

雨過山光欲溜寒來水氣如蒸勝處何須吳越隨方  
亦有遊朋

揚雄執戟雖久陶令歸田未能眼看雲山無奈神傷  
簿領相仍

終歲常親鞭朴此生知負詩書欲尋舊學無處時有



故人起予

故人遠在江漢萬里時寄聲音聞道禪心寂寞未廢  
詩人苦吟

佳句近參風雅微詞間發離騷竊欲比君庾信莫年

詩賦尤高

相思欲見無路滿秩西歸有時及君鈴閣少事飲我  
松醪滿卮

次韻李公擇寄子瞻

青蒲一下復東來擁扇西風蒲面埃擊柝自營何擇  
地鋪糟同醉未須回孤高振鷺瞻初下淡泊嬰兒及

未孩我亦漂流家萬里年來羞上望鄉臺

次韻李公擇以惠泉答章子厚新茶二首

無錫銅瓶手自持新芽顧渚近相思故人贈答無千  
里好事安排巧一時蟹眼煎成聲未老兔毛傾看色

尤宜槍旗攜到齊西境更試城南金線竒

金線泉在齊州城南

新詩態度霽春雲肯把篇章妄與人性似好茶常自  
養交如泉水久彌親睡濃正想羅聲發食飽尤便粥

面勻底處翰林長外補明年誰送雪溪春

和李公擇赴歷下道中雜詠十二首

泛清河



南北無多水崎嶇未捨船何時好霖雨是處有通川  
墳壠看書卷興亡指道邊蒼茫半秋草猶復較愚賢  
將至桃園阻淺且風不得進

卷帆倚棹淺河津憶泛長江步步新未免生涯寄風  
浪不堪舟楫委埃塵往來欲就沙囊堰深淺時看舉  
策頻一望雲霓百憂集應思平地隱居人

桃園阻淺將易小舟一夜水大至復乘便風  
頃刻百里

此生與物妄相仇欲往長嫌苦見留淺瀨何知向人  
惡漲溪豈復爲公流雨痕忽到工催客風信初來轉

打頭舉目汀洲都未改忽添清興滿行舟

下邳黃石公廟

圯下相逢南北人三邀不勸識天真十年却見穀城  
下寂寞同收一夢身

宿遷項羽廟

尺箠西來壠畝中驅馳力盡衆兵衝舊封獨守君臣  
義故國長修俎豆容平日軍聲同破竹少年心事喜  
摧鋒錦衣眷戀多鄉思肯顧田家社酒釀

呂梁

出沒懸流雖有道憑陵險地本無心未能與物都無



礙咫尺清泉亦自深

梁山泊 次韻

近通沂泗麻鹽熟遠控江淮粳稻秋粗免塵泥汗車  
脚莫嫌菱蔓繞船頭謀夫欲就桑田變客意終便畫  
舫遊愁思錦江千萬里漁簑空向夢中求 時議者將  
乾此泊以

種菽  
麥

梁山泊見荷花憶吳興五絕 次韻

南國家家漾絲艫芙蓉遠近日微明梁山泊裏逢花  
發忽憶吳興十里行  
終日舟行花尚多清香無柰着人何更須月出波光

淨臥聽漁家蕩槳歌

行到平湖意自寬繁花仍得就船看回頭却向吳儂  
說從此遠遊心未闌  
花開南北一般紅路過江淮萬里通飛蓋靚粧迎客  
笑鮮魚白酒醉船中

菰蒲出沒風波際鴈鴨飛鳴霧雨中應為高人愛吳  
越故於齊魯作南風

次韻李公擇九日見約以疾不赴

它年逢九日杯酒逐英豪漸老經秋病獨醒何處高  
床頭添藥裏坐上減牛毛寂寞知誰問煩公置濁醪



喜雪呈李公擇

秋來早已久雪至亦不薄沉沉夜未眠  
蔌蔌聲初落霏微入疎戶眩晃先朱閣  
披衣視羣動照屋始驚愕晨起犯清寒  
繁陰看漠漠喬林凍相倚隙瓦乾猶爍  
孤村掩圭竇深逕沒芒屨平野恣汗漫  
四山增犖峩晚色漏斜陽林光粲相錯  
氛埃一清蕩疫癘解纏縛寒蔬養春芽  
宿麥布冬脚官居亦何賴歲事信所託  
逋逃幸一飽剽盜止羣惡無事樂自多有  
酒庶可酌我行今不久公到時方昨豐穰  
識天意暇豫可前約齋廚雖無餘賓客  
甚易諾行須酒壺倒莫待陰雲剝

次韻范郎中仰之詠雪

倉廩未應空長天霰雪濛瓊瑤布地淨  
組練出師雄雲閣諸峰遍花繁百草同  
農諶麥壠外客興酒杯中聚散占風力  
消融驗藥功歷城西北陽起石山其上不留雪遠遊聊自喜二見歲時豐

次韻李公朝著作見贈二首

遠客徒爲爾江邊有故丘汀洲信廣大  
鳧雁任漂浮好事時攜酒歸心久倦遊  
還鄉定衰老朋友肯相收其二

稽古終何力扶衰謾有方故人憐困躓  
佳句贈輝光



未暇抽身去安能插翅翔空存踈懶性高臥笑羲皇

惠穆呂公挽詞二首

全齊開故國清廟饗元功德業真無忝勲名但未克  
邊防推信惠社稷倚勤忠不作司徒貴何慙鄭武公

其二

風俗非平昔賢豪棄此時新阡長宿草行路拜豐碑  
惠術遐方記嘉猷信史知悲涼哭墳客不爲受恩私

次韻蔣夔寒夜見過

都城廣大漫如天旅人騷屑誰與歡北風號怒屋無  
瓦夜氣凝冽冰生槃雪聲旋下白玉片燈花暗結丹

砂丸叩門剝啄驚客至吹火倉卒憐君寒明時未省  
有遺棄高論自笑終汗漫識君太學嗟歲久至今客  
舍猶泥蟠正如憔悴入籠鶴坐見摧落凌風翰明朝  
尚肯過吾飲有酒不盡行將酸

次韻王鞏廷評招飲

病憶故鄉同越鳥性安田野似禪譙都城歲晚不歸  
去客舍夜寒猶獨吟樽酒憐君偏好客詩篇寄我謬  
知音會須雪裏相從飲履迹旋平無處尋

雪中會孫洙舍人飲王氏西堂戲成三絕

新歲逼人無一日殘冬飛雪已三迴百分瓊珀從君



勸十里瓊瑤走馬來

南國高人真巨源華堂邂逅接清樽十年一見都如  
夢莫恠終宵語笑喧

傾盡香醪雪亦晴東齋醉臥已三更佳人不慣生疎  
客不盡清歌宛轉聲

雪中呈范景仁侍郎

羈遊亦何樂幸此賢主人東齋暖且深高眠不知晨  
開門驚照曜舞雪方繽紛繁雲覆庭廡落勢一何勻  
霏霰本無着積疊巧相因萬類忽同色九衢淨無塵  
園林開組練觀闕堆瓊珉蟲書散鳥足綰帶翻車輪

遠遊浩千里欲出迷四隣誰言助春農亦善欺客貧  
賴我古君子高談吐陽春方當庇華屋豈憂無束薪

次韻景仁丙辰除夜

數舉除夜酒稍消少年豪浮光寄流水妙理付濁醪  
微陽未出土大雪飛鵝毛試問冰霜勁春來能久牢

次韻景仁招宋溫之職方小飲

高人兩無事相見輒傾懷時以酒相命何妨心自齋  
燈期飛雪亂春候苦寒乖不就頽然醉難堪風且霾

次韻景仁飲宋溫之南軒二首

白髮迎新歲皤然國老更感時能細說對酒任徐行



畫軸高分品詩詞妙入評疎狂先醉倒應許恃鄉情  
其二

飲闌餅已罄話久僕須更高會良難得危言豈易行  
歸休便老計得失任臺評猶有青編在它年不世情  
次韻景仁正月十二日訪吳鎮寺丞二絕

夜雪滿庭雞失晨瓊田早出不驚塵急須卷凍鋪黃  
道欲看燈山萬萬人

濁醪時飲十分杯萬象溟濛曉氣皚醉倒籃輿夜歸  
去金吾寧復識誰哉

柳子玉郎中挽詞二首

晚歲抽身塵土中瀟山仍乞古仙宮羞將白髮隨馮  
叟欲就丹砂繼葛洪龍虎未能留物化芭蕉久已悟  
身空騷人欲作招魂賦蟬蛻疑非世俗同  
新詩錦繡爛成編醉墨龍蛇灑未乾共首卜居空舊  
約宛丘攜手憶餘歡風流可見身如在鄉國全歸意  
所安行到都門送君處長河清淚兩泂瀾

贈淨因臻長老

十方老僧十年舊燕坐繩床看奔走遠遊新自濟南  
來滿身自覺多塵垢煖湯百斛勸我浴驪山衮衮泉  
傾竇明窓因臥百緣絕此身瑩淨初何有清泉自清



身自絜塵垢無生亦無滅振衣却起就華堂老僧相  
對無言說南山采菌軟未乾西園擷菜寒方茁與君  
飽食更何求一杯茗粥傾銅葉

次前韻答景仁

儒林談道亦云舊遠自太史牛馬走區區分別竟何  
爲擾擾祗添心上垢道大如天不可測異出同歸各  
穿竇浩然一水散千漚却觀彼我曾無有我丈中心  
冰玉絜世上浮榮盡灰滅終年行道自不知笑指空  
門名異說此心未信道不生石上下種何由茁道在  
起居飲食中安問胡僧分五葉

遊城西集慶園

送客城西客已遠歸路北池接南苑冰澌片斷水光  
浮柳線和柔風力軟繚牆朱戶誰家園流水平畦春  
日淺禁河分溜一池足洛園移花百金賤飛甍斤斧  
聲未絕翠栢栽培影初遍傍人笑指高臺處前年適  
見荒榛滿金錢力奪天地功歲月未多風物換人生  
富貴無不成都門坐置山林觀暖風遲日時一到早  
出莫歸應未晚主人最貴稀出城長使憧憧路人看

遊景仁東園

新春甫驚蟄草木猶未知高人靜無事頗恠春來遲



肩輿出東郊輕裘試朝曦百草抱生意喬松解寒姿  
 尺書招友生冠蓋溢通達人生瞬息間幸此休暇時  
 濁酒滄浮蟻嘉蔬薦柔萸春來莫嫌早春去恐莫追  
 公卿多王事田野遂我私松筠自擁蔽里巷得遊嬉  
 隣家竝侯伯朱門掩芳菲畦花被錦繡庭檜森旌旗  
 華堂絢金碧疊觀凝煙霏髣髴象宮禁蕭條遠喧卑  
 徐行日一至何異已有之都城閉門早衆客紛將歸  
 垂楊返照下歸騎紅塵飛但卜永日歡未與清夜期  
 人散衆囂絕庭光星斗垂安眠萬物外高世良在茲

欒城集卷之六 終

欒城集卷之七

宋 西蜀蘇轍子由 著

明 東吳王執禮子敬 校

詩五十六首

次韻子瞻送范景仁遊嵩洛

尋山非事役行路不應難洛浦花初滿嵩高雪尚寒  
 平林抽凍筍竒艷變山丹節物朝朝好肩輿步步安  
 醪醖釀臘酒苜蓿薦朝盤得意忘春晚逢人語夜闌  
 歸休三黜柳賦詠五噫鸞鶴老身仍健鴻飛世共看  
 雲移忽千里世路脫重灘西望應思蜀東還定過韓



平川涉清潁絕頂上封壇出處看公意令人欲棄官  
送蔣夔赴代州教授

憶遊太學十年初猶見胡公豈第餘遍閱諸生非有  
道最憐能賦似相如青衫共笑方持板白髮相看各  
滿梳暫免百憂趨長吏勉調三寸事新書

次韻宿州教授劉涇見贈

此身雖復類潛夫衰老無心強著書道路不知奔走  
賤交遊空恠往還踈弦歌更就三年學簿領唯添一  
味愚它日相逢定何處莫將文采笑空踈

徐州送江少卿

夜雨泗河深曉日輕舟發帆開送客遠城轉高臺沒  
居人永瞻望歸意何倉卒公來初無事豐歲多年麥  
鈴閣渡清風芳樽對佳客登臨未云厭談笑方自適  
朝廷念鰲老府寺虛清劇何以寄風流江山遶官宅  
次韻子瞻寄眉守黎希聲

眼看狂瀾倒百川孤根漂蕩水無邊思家松菊荒三  
逕回首謳歌沸二天簿領沉迷催我老春秋廢格累  
公賢隣居屈指今誰在一念傷心十五年

轍昔侍先人於京師與希聲隣居太學前是時公之亡兄與二亡妹皆在今十五年而在者唯公與僕二人言之流涕

和李邦直學士沂山祈雨有應



宿雪雖盈尺不救春夏旱吁嗟遍野天不聞歌舞通  
宵龍一戰旋開雲霧布旌旗復遣雷霆助舒卷雨聲  
一夜洗塵埃流入溝河朝不見但見青青黍與禾老  
農起舞行人歌汗邪蒲車尚可許供輸到骨期無它  
水行天地有常數歲歲出入均無頗半年分已厭枯  
槁及秋更恐憂滂沱誰能且共蛟龍語時布甘澤無  
庸多

陪子瞻遊百步洪

城東泗水平如席城頭遠山涵落日輕舟鳴榔自生  
風渺渺江湖動顏色中洲過盡石縱橫南去清波頭  
盡白岸邊恠石如牛馬銜尾舳艫誰敢下没人出沒  
須臾間却立沙頭手足乾客舟一葉久未上吳牛回  
首良間關風波蕩瀟未可觸歸來何事嘗艱難樓中  
吹角莫煙起出城騎火催君還

李邦直見邀終日對臥南城亭上二首

一徑坡陀草木間孤亭勝絕俯川原青天圖畫四山  
合白晝雷霆百步喧煙柳蕭條漁市遠汀洲蒼莽白  
鷗翻客舟何事來忽草逆上波濤吐復吞  
東來無事得遨遊奉使清閑亦自由撥棄簿書成一  
飽留連語笑失千憂舊書半卷都如夢清簟橫眠似



欲秋聞說歸朝今不久塵埃還有此亭不

次韻邦直見答二首

真能一醉逃煩暑定勝三杯禦臘寒自有詩書供永  
日莫將絲竹亂風灘舞雩何處歸春莫叩角誰人怨  
夜漫聞道丹砂近有術錙銖稱火共君看

五斗塵勞尚足留閉門聊欲治幽憂羞爲毛遂囊中  
穎未許朱雲地下遊無事會須成好飲思歸時亦賦  
登樓羨君幕府如僧舍日向城隅看浴鷗

再次前韻四首

城頭棟宇恰三間楚望淒涼弔屈原雨洗山川百里

淨風吹語笑一城喧鄉書莫問經時絕歲事初驚片  
葉翻南近清淮鱸鱖好的釣筒時問有潛吞

謬將疎野託交遊平日論心亦有由科第聯翩叨舊  
契利名疎闊少新憂清談已覺忘朱夏濁酒先防虐  
素秋多病無聊唯有睡頻頻詩句未嫌不

野鶴應疑鳧苦夏蟲未慣雪霜寒隱居顏氏終安  
巷垂釣巖生自有灘破宅不歸塵可掃下田初種水  
應漫退耕尚作悠悠語拙宦猶須步步看

欲作彭城數月留溪山勸我暫忘憂城頭準擬中秋  
望臺上遷延九日遊嵐氣雨餘侵近郭江聲風送隱



危樓汀洲聚散知誰恠且學漂浮水上鷗

雨中陪子瞻同顏復長官送梁燾學士舟行歸

汶上

客從南方來信宿北方去手棹木蘭舟不顧長江雨  
江昏氣陰黑雨落無朝暮蕭蕭赴波濤濛濛暗洲渚  
微涼入窻闔斜吹濕蕉苧漂灑正紛紜談笑方容與  
不知江路長但覺青山驚客去浩難追落日平西浦  
東遊本無事愛此山河古周旋樽俎歡邂逅英豪聚  
茲遊有遺趣此樂恐宜屢賤仕迫程期遷延防譴怒  
秋風日已至輕舸行當具陰森古城曲蒼莽交流處

懸知別時念將行重回顧非緣一寸祿應作三年任

同子瞻泛汴泗得漁酒二詠

江湖性終在平地難久居淶水雨新漲扁舟意自如  
河身縈疋素洪口轉千車願言棄城市長竿夜獨漁

其二

懶思久廢詩病腸不堪酒強顏水石間濫蹟賓主後  
不知白浪翻但恠青山走莫隨使車塵豈畏嚴城斗

明日復賦

放舟城西南却向東南泊朝來雨新霽白水浸城脚  
古汴多流苴清泗亦浮沫平吞百澗暴滅盡三洪惡



遊人不勝喜水族知當樂舟行野鳧亂網盡脩鱗躍  
香醪溜白蟻鱠縷填花萼人生適意少一醉皆應諾  
同遊非偶然後會未前約簡書尚見寬行日爲公却  
贈吳子野道人

食無酒肉腹亦飽室無妻妾身自好世間深重未肯  
回達士清虛輒先了眼看鴻鵠薄雲漢長笑駑駘安  
棧早腹中夜氣何郁郁海底朝陽常杲杲一塵不顧  
舊山深萬里來看故人老空車獨載王陽橐遠遊屢  
食安期棗東州相逢真邂逅南國思歸又驚矯道成  
若見王方平背癢莫念麻姑瓜

李邦直出巡青州余不久將赴南都比歸不及

見矣作詩贈<sub>另</sub>

東道初來託故人南樓頻上泗河漕江山尚有留人  
意樽俎寧當厭客貧顧我及秋行不久問君觸熱去  
何因西歸涼冷霜風後濁酒清詩誰與親

司馬君實端明獨樂園

子嗟丘中親藝麻邵平東陵親種瓜公今歸去事農  
圃亦種洛陽千本花修篁遶屋韻寒玉平泉入畦紆  
臥虵錦屏竒種斲巖竇高高靈藥移萌芽城中三月  
花事起肩輿遍入公侯家淺紅深紫相媚好重樓多



葉爭矜誇一枝盈尺不論價十千斗酒那容賒歸來  
曳履苔逕滑醉倒閉門春日斜車輪班班走金轂印  
綬若若趨朝衙世人不顧病楊綰弟子獨有窮侯芭  
終年著書未曾厭一身獨樂誰復加宦遊嗟我久塵  
土流轉海角如浮槎歸心每欲自投劾孺子漸長能  
扶車過門有意奉談笑幅巾懷刺無袍鞞

送顏復赴闕

簞瓢未改安貧性鳧繹猶傳直道餘不見失官愁感  
感但聞高臥起徐徐居中舊厭軍容講補外仍遭城  
旦書此去將身置何許秋風未免憶鱸魚

王詵都尉寶繪堂詞

侯家玉食繡羅裳彈絲吹竹喧洞房哀歌妙舞奉清  
觴白日一醉萬事忘百年將種存慨慷西取庸蜀踐  
戎羌戰袍賜錦盤鵬章寶刀玉玦餘風霜天孫渡河  
夜未央功臣子孫白且長朱門甲第臨康莊生長介  
冑羞膏粱四方賓客坐華堂何用為樂非笙簧錦囊  
犀軸堆象牀竿叉連幅翻雲光手披橫素風飛揚長  
林巨石插雕梁清江白浪吹粉牆異花沒骨朝露香

徐熙畫花落筆縱橫其子嗣變格以五色染  
就不見筆迹謂之沒骨蜀趙昌蓋用此法耳

獸舌鵲張騰踏驤裊聯驪嘖振風雨馳平岡前數



顧陸後吳王老成雖喪存典常坐客不識視茫洋騏  
 麟飛煙郁芬芳卷舒終日未用忙遊意淡泊心清涼  
 屬目俊麗神激昂君不見伯孫孟孫俱猖狂干時與  
 事神弗臧

逍遙堂會宿二首 并引

轍幼從子瞻讀書未嘗一日相舍既壯將遊宦四方  
 讀韋蘇州詩至安知風雨夜復此對床眠惻然感之  
 乃相約早退為閑居之樂故子瞻始為鳳翔幕府留  
 詩為別曰夜雨何時聽蕭瑟其後子瞻通守餘杭復  
 移守膠西而轍滯留於淮陽濟南不見者七年熙寧

十年二月始復會於澶濮之間相從來徐留百餘日  
 時宿於逍遙堂追感前約為二小詩記之

逍遙堂後千尋木長送中宵風雨聲誤喜對床尋舊  
 約不知漂泊在彭城

秋來東閣涼如水客去山公醉似泥困臥北窓呼不  
 起風吹松竹雨淒淒

過張天驥山人郊居

南山莫將歸下訪張夫子黍稷滿秋風蓬麻翳隣里  
 君年三十八三十有歸意躬耕奉慈親未覺鉏耰鄙  
 讀書北窓竹釀酒南園水松菊半成陰日有幽居喜



客來時借問問子何年起新求西溪石更築茆堂址  
但令三歲熟此計行亦遂堂成不出門清名滿朝市  
魏佛狸歌  
魏佛狸飲泗水黃金甲身鐵馬塞睥睨山川俯畫地  
畫作西方佛名字卷舒三軍如使指奔馳萬夫鑿山  
紫雲中孤月妙無比青蓮湛然俛下視擊鉦卷旆抽  
行營北徐府中軍吏喜度僧築室依雲煙俯窺城郭  
衆山底興亡一瞬五百年細草荒榛沒孤壘

雜興二首

陋巷丈夫病且貧懸鶉白結聊庇身蠕蠕大蟲長孫  
子敗繒弊絮開陽春故襦寬博裹肩胛出沒逡巡初  
莫畏一朝換酒入隣家顧視甯間猶犢鼻入縫循腰  
還自足肌膚轉近尤爲福咋皮吮血無已時應待渠  
家具湯沐

朱輪華蓋事遠遊廡無良馬乘疲牛青絲玉勒金絡  
頭任重道遠旁人憂奔馳往來歷山丘騰坑投淖摧  
轅軸已壓復起行未休青芻黃梁爲君羞長路漫漫  
經九州場有白駒胡不收饑食玉山飲河流朝秣幽  
冀莫炎陬奔雲掣電不少留僕夫顧之心懷愁王良  
不生誰與謀哀哉駿骨千金酬



贈致仕王景純寺丞

瀟山隱君七十四，紺瞳綠髮初謝事。腹中靈液變丹砂，江上幽居連福地。彭城爲我住三日，明月滿船同一醉。丹書細字口傳訣，顧我沉迷真棄耳。年來四十髮蒼蒼，始欲求方救憔悴。它年若訪瀟山居，慎勿逃人改名字。

初發彭城有感寄子瞻

秋晴卷流潦，古汴日向乾。扁舟久不解，畏此行路難。此行亦不遠，世故方如山。我持一寸刃，巉絕何由刊。念昔各年少，松筠閔南軒。閉門書史叢，開口治亂根。

文章風雲起，曾膽渤海寬。不知身安危，俛仰道所存。橫流一傾潰，萬類爭崩奔。孔融漢儒者，本自輕曹瞞。誓將貧賤身，一悟世俗昏。豈意十年內，日夜增濤濶。生民竟顛顛，遊宦豈復安。水深火益熱，人知蹈憂患。甄豐且自叛，劉歆苟盤桓。而况我與兄，飽食顧依然。上願天地仁，止此禍亂源。歲月一徂逝，尚能反丘園。

次韻子瞻見寄

袞袞河渭濁，皎皎江漢清。源流既自異，美惡終未明。嗟我頑鈍質，乃與公立生。出處每自託，謳吟輒嘗賡。譬如病足馬，共此千里程。勝負坐已決，豈待終一枰。



憶公年少時濯濯吐新萌  
堅姿映松栢直節凌榛荆  
學成志益厲秋霜落春榮  
澹然養浩氣脫屣遺齊卿  
百鍊竟不變三年終未鳴  
區區兩郡守籍籍四海聲  
年來效瘖默世事慵  
譏評不見室家好  
恍如揖重城  
別離長塵垢歲月何崢嶸  
彭門偶會合白髮互相驚  
受教恐不足吐論那復爭  
疾雷發聾聵清月照昏盲  
篤愛未忍棄浪云舊齊名  
更請問郭許題品要當精

子瞻杭州見寄詩云  
先生別駕舊齊名

將至南京雨中寄王鞏

河牽一線流不斷雨散千絲卷  
却來煙際橫橋村十

里船中倦客酒三杯  
老年轉覺脾嫌濕世路早令心  
似灰賴有故人憐寂寞繫舟待我久徘徊

次韻王鞏見贈

南都逢故人共此一樽深  
初來柳吹絮再見風脫木  
我老歡意微頭垂腰背曲  
羨子方少年健馬走平陸  
狂歌手自拊醉倒頭相觸  
人生比一瞬世網張萬目  
但取食場雞豈掛雲飛鵠  
彭城久相遲官舍虛東屋  
重陽試新釀謂子當不速  
胡爲聽婦言婉變自相逐  
我舟得愁霖牽挽脫坑谷  
風霜作初寒病體欲生粟  
解子腰下龜換酒不須贖  
照碧凝清光相將飲萸菊



送交代劉莘老

三元一二間多士四方至翩翩下鴻鵠一一抱經緯  
石更唯諾爵祿相饋遺縱橫聖賢業磊落君臣意  
魯諸生雍容古君子扶搖雲漢上睥睨千萬里  
八臺霜凜然不肯下詞氣失足青冥中投命江湖裏  
區區留都客矯矯當世士空使往來人歎息更相指  
我生本羈孤無食強爲吏褰裳避塗泥十載守顛顛  
逝將老茅屋何幸繼前軌念君今尚然顧我真當爾  
百年同一夢窮達浪憂喜有酒慰離愁貧賤非君耻  
次韻王鞏九日同送劉莘老

頭上黃花記別時樽中綠酒慰清悲畫船牽挽故不  
發紅粉留連未遽離小雨無端添別淚遙山有意助  
顰眉十分酒盞從教勸堆案文書自此辭

次韻王鞏欲往徐州見子瞻以事不成行

河水南來遶郡城銀刀空復銜衙兵交情舊許雞爲  
具客信那知鵲妄鳴爲婦遲留應未怪還家倉卒定  
何營不關秦女箏聲怨自趨招賢浚上旌

宣徽使張安道生日

從公淮陽今幾年憶持壽筭當公前祝公齒髮老復  
少歲歲不改冰霜顏掃除四海一清淨整頓萬物俱



安全今年見公商丘側奉祠太一真仙官身安氣定  
色如玉脫遺世俗心浩然幽居屢過赤松子長夜親  
種丹砂田此中自有不變地歲閱生日如等閑門前  
賀客任填委世上多故須陶甄秋風坐見蒲柳盡歲  
晏惟有松栢堅斯人未安公未用使公難老應由天  
馮唐垂老郎潛後李白風流罷直餘解組同歸榮故  
國剖符仍得奉安輿家聲未替三公舊墓客應傾數  
郡車德映閨門人莫見埋文子細列幽墟

聞王鞏還京會客劇飲戲贈

聞君歸去便招呼笑語不知清夜徂結束佳人試銀  
甲留連狂客惱金吾燭花零落玉山倒詩筆欹斜翠  
袖扶暫醉何年依錦瑟東齋還復臥鸞甃

次韻王鞏遊北禪

蕭蕭黃葉下城頭頓作野田風日秋粗有樽壘隨處  
好暫無敲朴便能幽人稀野鳥應同樂水涸遊魚似  
欲愁客去知君歡未已遶城攜手更遲留

次韻王鞏懷劉莘老

兩都來往太頻頻真是人間自在人十載讀書同白  
屋千金爲客買朱唇結交京邑傾心肺寓思禪宗離



垢塵爲問西歸天祿客何時同看洛川神

飲餞王鞏

送君不辦沽斗酒撥醅浮蟻知君有問君取酒持勸  
君未知客主定何人府中杯棬強我富案上首霜知  
吾真空廚赤脚不敢出大堤花艷聊相親愛君年少  
心樂易到處逢人便成醉醉書大軸作歌詩頃刻揮  
毫千萬字老夫識君年最深年來多病苦侵凌賦詩  
飲酒皆非敵危坐看君浮太白

送王鞏兼簡都尉王詵

可憐社老貧無食杖藜曉入春泥濕諸家厭客頗惱  
人徃徃閉門不得入我今貧與此老同交遊冷落誰  
相容幸君在此足遊衍終日騎馬西復東送君仍令  
君置酒如此貧交世安有君歸速語王武子因君回  
船置十斗

呂希道少卿松局圖

溪回山石間蒼松立四五水深不可涉上有橫橋渡  
溪外無居人磐石平可住縱橫遠山出隱見雲日莫  
下有四老人對局不回顧石泉雜風松入耳如暴雨  
不聞人世喧自得山中趣何人昔相遇圖畫入紈素  
塵埃依古壁永日奉樽俎隱居畏人知好事竟相誤



我來再三嘆空有飛鴻慕逝將從之遊不惜爛樵斧

寄孔武仲

濟南舊遊中好學惟君耳君居面南麓洶湧岡巒起  
我來輒解帶簷下炙背睡煎茶食梨栗看君誦書史  
君歸苦倉卒窻戶日摧毀遷居就清曠改築富前址  
開畦得遺植遶壁見題字雲山顧依然簿領輒隨至  
思君猶未忘滿秩行自棄爾來鉅野溢流潦壓城壘  
池塘漫不知亭榭日傾弛官吏困堤障麻鞋汗泥滓  
別來能幾何陵谷既遷徙它日重相逢衰顏應不記

孔君亮郎中新葺闕里西園棄官而歸

宦情牢落苦思歸君側無人留子思手種松筠須灌  
漑親修寢廟憶丞祠定應此去添桃李還似舊塋無  
棘茨他日東遊訪遺烈因公導我謁先師

寄濟南守李公擇

岱陰皆平田濟南附山麓山窮水泉見發越遍溪谷  
分流遶塗巷暖氣烝草木下田滿粳稻秋成比禾菽  
池塘浸餘潤菱芡亦云足辭家四千里恃此慰窮獨  
公從吳興來茗雪猶在目應恐齊魯間長被塵土辱  
不知西垣下滉漾千畝淥仰見鷗鷺翻俯視龜魚浴  
初來厭桴鼓稍久捐鞭朴清詩調嘉賓夜話繼華燭



飛花暮雪深浮蟻糟床熟相對各忘歸西來自嫌速  
人生每多故樂事難再卜鉅野一汗漫河濟相騰蹙  
流沙翳桑土蛟蜃處人屋農畝分沉埋城門遭板築  
傷心念漂蕩引手救顛覆勞苦空自知吁嗟欲誰告  
遙知舊遊處落落空遺躅平生讀書史物理粗能矚  
歸耕久不遂終作羝羊觸賦詩心自驚請公再三讀  
雪中會飲李倅釣東軒三絕  
衆客喧譁發酒狂逡巡密雪自飛揚莫嫌作賦無枚  
叟且喜延賓有孝王

雪花如掌墮堦除劇飲時看卧酒壺半夜瓊瑤深沒  
膝欲歸迷路肯留無

竹裏茅庵雪覆簷爐香藹藹著蒲簾欲求初祖安心  
法笑我醺然已半酣

張恕寺丞益齋

人生不讀書空洞一無有羨君常齋居散帙蒲前後  
開編試尋繹閱歲行自富從橫畫圖出次第宮商奏  
汪洋畜江河眇莽包林藪興亡數千歲絡繹皆在口  
顧念今所知頗覺前日陋我家亦多書早歲嘗竊叩  
晨耕掛牛角夜燭借鄰牖經年謝賓客飢坐失昏晝  
堆甃稍蟠屈落筆逢左右樂如聽鈞天醉劇飲醇酎



自從厭蓬華誤逐功名誘初心一漂蕩舊學皆榛莠  
失足難遽回撫卷長自詎幸君無事年謂可終身守  
春耕不厭深秋穫當自受金玉或為災詩書豈相負

除夜會飲南湖懷王鞏

歲晚城東故相家夜聽簾外落瓊花醉眠東閣銀缸  
暗起視中庭風竹斜魯酒近來無柰薄秦箏別後苦  
聞誇思君勸對空陂飲歸去紛如日莫鷓

次韻張恕戲王鞏

去歲此日大雪僕醉定國東齋

二君豪俊並侯家歌舞爭妍不受誇聞道肌膚如素  
練更堪鬢髮似飛鷓

送轉運判官李公恕還朝

我行未厭山東遠昔遊歷下今梁苑官如雞肋浪奔  
馳政似牛毛常黽勉幸公四年持使節按行千里長  
相見鷹掣秋田伏兔驚驥馳平野疲牛勸似憐多病  
與時違未恠兩州從事懶除書奪去一何速歸袖翩  
然不容挽黃河東注竭崑崙鉅野橫流入州縣民事  
蕭條委濁流扁舟出入隨奔電回首應懷微禹憂歸  
朝且喜寧親便公知齊楚即為魚勸築宣防不宜緩



*[Faint bleed-through text from the reverse side of the page]*

樂城集卷之八

宋西蜀蘇轍子由著

明東吳

王執禮子敬

全校

顧天叙禮初

詩六十八首

寄范文景仁

京城冠蓋如雲屯日中奔走爭市門弊裘瘦馬不知  
路獨向城西尋隱君隱君白髮養浩氣高論驚世門  
無賓欣然爲我解東閣明窓淨几舒華茵春天雪花  
大如手九衢斷絕愁四隣平明熟睡呼不覺清詩綠  
酒時相親我兄東來自東武走馬出見黃河濱及門



却遣不得入回顧欲去行無人東園桃李正欲發開  
門借與停車輪青天露坐列觴豆落花飛絮飄衣巾  
留連四月聽鷓鴣扁舟一去浮奔渾人生聚散未可  
料世路險惡終勞神交遊畏避恐坐累言詞欲吐聊  
復吞安得如公百無忌百間廣厦安貧身

次韻王鞏上元見寄三首

棄擲良宵君謂何清天流月鑑初磨莫辭病眼羞紅  
燭且試春衫剪薄羅蓮艷參差明繡戶舞腰輕瘦颭  
驚鼉少年微服天街闊何處相逢解佩珂  
繁燈厭倦作閑遊行到僧居院院留月影隨人深有

意車音爭陌去如流酒消鑿落寧論斗魚照琉璃定  
幾頭過眼繁華真一夢終宵寂寞未應愁  
燈火熏天處處同暗遊應避栢臺驄高情自放喧闐  
外勝事偏多淡泊中平日交遊徒夢想留都歌吹憶  
年豐知君未有南來意歸去相從光與鴻

謝張安道惠馬

從事年來鬢似蓬破車倦僕衆人中作詩僅比窮張  
籍得馬還從老晉公夜起趨朝非所事曉騎行樂定  
誰同慣乘款段遊田里怯聽駸駸兩耳風

張水部集有謝裴晉

公惠馬詩



次韻子瞻贈梁交左藏

彭城欲往臺無檄初喜東西合爲一將軍走馬隨春  
風精銳千人森尺籍口占佳句驚衆坐手練強兵試  
鳴鏑酒酣起舞花滿地醉倒不聽人扶出歸來相對  
如夢寐虎踞熊經苦岑寂黃樓方就可同遊飲盡官  
厨三百石

寒食遊南湖三首

春睡午方覺隔牆聞樂聲肩輿試扶病畫舫聽徐行  
適性逢樽酒開懷挹友生遊人定相笑白髮近從橫  
其二

遶郭春水滿被堤新柳黃官池無禁約野艇得飛揚  
浪泛歌聲遠花浮酒氣香晚風歸棹急細雨濕紅粧  
其三

攜手臨池路時逢賣酒壚柳斜低繫纜草綠薦傾壺  
波蕩春心起風吹酒力無冠裳強包裹半醉遣誰扶  
觀大閱

承平郡國減兵屯唯有留都一萬人票姚將軍思出  
塞從橫幕府諱和親旌旗不動風將轉部曲無聲馬  
亦馴八陣且留遺法在未須親試革車塵

送林子中安厚卿二學士奉使高麗二首



東夷從古墓中華萬里梯航今一家夜靜雙星先渡  
海風高八月自還槎魚龍定亦知忠信象譯何勞較  
齒牙屈指歸來應自笑手持玉帛賜天涯  
官是蓬萊海上仙此行聊復看桑田鯤移鵬徙秋帆  
健潮闊天低曉日鮮平地誰言無嶮阻仁人何處不  
安全但將美酒盈船去多作新詩異域傳

送趙屺祕書還錢塘

世人何局促奔走鬢蒼蒼聞道餘杭守獨遊何有鄉  
禪心朝吐月元氣夜生光清靜安罷瘵寬仁服暴強  
聲名高一世風采見諸郎謁帝朱爲綬還家綵作裳

經過留畫舫談笑接清觴問訊顏依舊崢嶸歲自長  
人生真幾許世味不堪嘗歸去聞詩罷求余却老方

馬上見賣芍藥戲贈張厚之二絕

春風欲盡無尋處盡向南園芍藥中過盡此花真盡  
也此生應與此花同  
春來便有南園約過盡春風約尚賒綠葉成陰花結  
子便須攜客到君家

答見和

花柳蕭條行已老聖賢希闊未嘗中眼看芍藥紛紛  
盡賴有櫻桃顆顆同



塵編何用朝朝看新釀還須處處賒好事若能頻載  
酒不妨時復到楊家

送呂希道少卿知滁州

長恠名卿亦坐曹忽乘五馬列旌旄才多莫厭官無  
事郡小不妨名自高庶子定應牽賦詠醉翁聊復繼  
遊遨試尋苦戰清流下要識經綸帝業勞

次韻張恕春莫

祇言城市無佳處亦有南湖幾度遊好雨晴時三月  
盡啼鶯到後百花休老猿好飲常連臂野馬依人自  
絡頭不肯低回池上醉試看生滅水中漚

次韻傅宏推官義方亭

居近古城心自幽簞瓢足用更何求鶯飛旋趁春風  
出龍臥終聞莫雨搜科第聯翩收甲乙鄉閭驚恠問  
因由隱君淡泊無人識長夏一衫冬一裘

送梁交之徐州

湖水清且深新荷半猶卷未見紅粧窈窕娘先排翠  
羽參差扇水面風生人未知歆傾俯仰長先見岸上  
遊人莫不歸清香入袖涼吹面投壺擊鞠綠楊陰共  
盡清樽食白飯坐中飛將忽先起輕衫出試彭門遠  
百步洪西白浪翻戲馬臺南雲岫滿江山雄麗信宜



人風流孰似梁王苑

次韻王鞏見寄

日永官閑自在慵  
門前客到未曾通  
憐君避世都門裏  
勸我忘憂酒盞中  
城下柳陰新過雨  
湖邊荷葉自翻風  
早須命駕追清賞  
大字新詩事事工

次韻李達見贈

太學羣遊經最明  
青衫顛顛竟何成  
羣鹽仍作當年味  
名譽飛蠅過耳聲

次韻秦觀秀才攜李公擇書相訪

濟南三歲吾何求  
史君後到消人憂  
君言有客輕公

疾扁舟相從古揚州  
致之匹馬恨無力  
千里相望同異域  
誦詩空使四坐驚  
隱居未易凡人測  
史君南歸無限情  
鴻飛攜書墮我庭  
此書兼置昔年客  
袖中秀句淮山青  
老夫強顏依府縣  
堆案文書本非願  
清談亶亶解人頤  
安得坐右長相見  
狂客吾非賀季真  
醉吟君似謫仙人  
未契長遭少年笑  
白髮應慙傾蓋新  
都城酒貴誰當換  
塵埃汗面非良筭  
歸來泗上苦思君  
莫待黃花秋爛漫

秦君與家兄子瞻約秋後再遊彭城

送龔鼎臣諫議移守青州二首

稷下諸公今幾人  
三爲祭酒髮如銀  
梁王宮殿歸留



鑰尚父山河屬老臣沂水弦歌重會點菑川故舊識  
平津過家定有金錢費千里爭看衣錦身  
面山負海古諸侯信美東方第一州勝勢未容秦地  
嶮竒花僅比雒城優新絲出盎冬裘具貢棗登場歲  
事休鈴閣虛閑官釀熟應容將佐得遨遊

送余京同年兄通判嵐州

矯矯吳越士遠爲并代行寒暄雖云異慷慨慰平生  
我昔在濟南君時事淄青連年食芋炙便欲忘尊羹  
問君棄鄉國何似弊屣輕丈夫事所志歸去無田耕  
閑官少愧耻教子終餘齡定心養浩氣閉目收元精

此志我亦然偶與長者并會合不可期未易夸者評

次韻王鞏見寄

觸事如碁一一低昏然一睡更何知賈生流落南遷  
後陶令衰遲歸去時去任由人真水母簞瓢粗足亦  
山雌年來未省談堯舜一呷麕踈豈足吹

河上莫歸過南湖二絕

西來白水滿南池走馬池邊日落時橋底荷花無限  
思清香乞與路人知  
淤田水淺客來遲解舫都門問幾時誰道兩京雞犬  
接差除屈指未曾知



送提刑孫頌少卿移湖北轉運

持節憂邦刑職業已自簡下車攝留都談笑事亦辦  
開軒揖佳客退食事書卷爲政曾幾何清風自無限  
官居歲月迫歸念湖湘遠依依東軒竹凜凜故人面  
詔書遂公私使節許新換舊治行當經家山企可見  
宦遊得鄉國勞苦顧猶願歸旆正滂洋行輶豈容緩

次韻劉涇見寄

天之蒼蒼亦何有亦有雲漢爲之章人生混沌一氣  
耳嘿嘿何用知肺腸孔公孟子巧言語剖瓢插竹吹  
笙簧含宮吐角千萬變坐令隱伏皆形相我生稟賦

本微薄氤氳方寸不自藏譬如蘭根在黃土春風驅  
迫生繁香口占手寫豈得已此亦未免物所將方將  
寂寞自收歛不受世俗斗尺量旣知仍作未能止紛  
紜竟亦類彼莊煎烹心脾擢胃腎自令鬢髮驚秋霜  
嗟子獨未知此病從橫自恃背瓜剛少年一見非俗  
物鏘然修竹鳴孤凰近來直欲扛九鼎令我畏見筆  
力強提攜童子從冠者揣摩五帝論三皇詩書近日  
貴新說掃除舊學漫無光竊攘瞿曇李耳牽挽性  
命推陰陽狂流袞袞去不返長夜漫漫未遽央詞鋒  
俊發魯連子慚愧田巴稱老蒼是非得失子自了一



醉早醒余所望

城南訪張恕

事似棼絲撥不開秋隨脫葉暗相催城南綠野宜幽  
步水北紅塵漫作堆赤棗青瓜報豐熟黃雞白酒勸  
徘徊此中真有醇風在一畝何年斲草萊

同李倅鈞訪趙嗣恭留飲南園晚衙先歸

城南高樓出喬木下有方塘秋水足新霜未變草木  
鮮晚日旋催梨棗熟雨荒松菊半榛莽風老菰蒲初  
瑟縮門前大路多塵土日中過客無留轂開門却掃  
如有待下馬升堂真不速勸我一振衣上黃臨風共

倒樽中淥肴蔬草草意不盡絲竹泠泠暗相屬琳宮  
仙伯自閒暇幕府龕官苦煩促晚衙簿領當及期後  
堂車轄要須漉令人更愧東宮師眷戀溪山棄葦屋  
次韻轉運使鮮于侁新堂月夜

長愛陶先生閑居棄官後床上臥看書門前自栽柳  
低徊顧微祿畢竟誰挽袖索莫秋後蜂青熒曉天宿  
惟將不繫舟託此春江溜尺書慰窮獨秀句驚枯朽  
遙知新堂夜明月入杯酒千里共清光照我茅簷漏

送梁交供知莫州

猛士當今守四方中原諸將近相望一樽度日空閒



暇千騎臨邊自激昂談笑定先降虜使詩書仍得靖  
戎行君看宿將何承矩安用摧鋒百戰場

秋祀高禩二絕

蕩蕩巍巍堯舜前一丘惟見柏森然後來秦漢何堪  
數跋扈飛揚得幾年

乾德年中初一新顏垣破瓦委荆榛興亡舉墜干戈  
際閒暇方知國有人

過興教贈釗上人

四十年間此院留臨河看盡往還舟回來立是三年  
客聽說行藏各自羞

次韻王鞏代書

去年河上送君時我醉看君倒接籬一笑便成經歲  
隔扁舟重到蒲城知舊傳北海偏憐客新恠東方苦  
慙饑應笑長安居不易空吟原上草離離

次韻南湖清飲二首

翠箔紅窓映大堤遠來清飲歎參差盈盈積水東西  
隔脉脉幽懷彼此知淥酒謾傳工破悶主人何敢恠  
顰眉明朝看月雲開未試與詹家一問龜

坐客經年半已非喜君重到暫相依不嫌愛酒樽頻  
倒只怕題詩紙屢飛耿耿幽懷誰與愬徐徐細酌未



應違從今更肯相過否幾誤風吹白版扉

次韻偶成

交情淡泊久彌新吏役縈纏日益紛香火社中真避世簿書叢裏強論文樽壘正及明蟾夜舟楫來隨早鴈羣世俗如君今有幾真將富貴等浮雲

中秋見月寄子瞻

西風吹暑天益高明月耿耿分秋毫彭城閉門青嶂合臥聽百步鳴飛濤使君攜客登燕子月色着人冷如水筵前不設鼓與鐘處處笛聲相應起浮雲卷盡流金丸戲馬臺西山鬱蟠杯<sub>中</sub>酒一時盡衣上白露

露三更寒扁舟明日浮古汴回首逡巡陵谷變河吞巨野入長淮城沒黃流只三版明年築城城似山伐木為堤堤更堅黃樓未成河已退空有遺蹟令人看城頭見月應更好河流深處今生草子孫幸免魚鼈食歌舞聊寬使君老南都從事老更貧羞見青天月照人飛鶴投籠不能出曾是彭城坐中客

次韻王鞏自詠

平生未省為人忙貧賤安閑氣味長粗兔趨時頭似葆稍能忍事腹如囊簡書見迫身今老樽酒聞呼首一昂欲挽天河聊自洗塵埃滿面鬢眉黃



次韻王鞏同飲王廷老度支家戲詠

巨魚紫鱗早霜前有酒何須問聖賢上客遠來工緩  
頰雙鬢爲出小垂肩新傳大曲皆精絕忽發狂言亦  
可憐莫恠貧家少還往自須先辦買花錢

送王鞏之徐州

遨遊公卿間結交非不足高秋遠行邁黃泥沒馬腹  
問君胡爲爾笑指籬間菊故人彭城守久作中朝逐  
詩書自娛戲樽俎當誰屬相望鶴頸引欲往龜頭縮  
前期失不遂浪語頻遭督黃樓適已就白酒行亦熟  
登高暢遠情戲馬有前躅篇章雜笑語行草爛盈幅

歸來貯篋筍把玩比金玉吾兄別我久憂患欲誰告  
孤高多風霆彈射畏顛覆白頭日益新歲寒喜君獨  
紛紛衆草中冉冉凌霜竹恨我閉籠樊無由託君轂  
次韻張恕九日寄子瞻

無限黃花簇短籬濁醪霜蟹正堪持坐曹漫爾誇勤  
瘁割肉何妨誚詆欺世外罇壘終自放俗間簿領莫  
相縻茱萸插遍知人少談笑須公一解頤

弟登高處插遍  
茱萸少一人

王摩結詩  
云遙知兄

戲次前韻寄王鞏二首

白馬貂裘錦羃羅離觴瀲灩手親持頭風欲待歌詞



愈肺病甘從酒力欺不分歸心太忽草更憐人事苦  
縈縻相逢借問空長歎便捨靈龜看朵頤

細竹寒花出短籬故山耕耒手曾持心遊麈比鳧鷖  
集歸計長遭句僂欺歌舞夢回空歷記友朋飛去自  
難縻悠悠後會須經歲冉冉霜髭漸滿頤

贈杭僧道潛

月中依松鶴露下抱葉蟬賦形已孤潔發響仍清圓  
潛師本江海浪迹遊市塵髭長不能翦衲壞聊復穿  
瘦骨見圖畫禪心離攀緣出言可人意一一皆自然  
師藏何深不與世俗傳舊識學士復從璉耆年

塵埃既脫落文彩自精鮮落落社中人如我亦有旃  
柰何一相見撫卷坐長歎歸去勿復言山林信多賢

張安道生日二首

椿年七十二迴新逢矢桑弧記此晨養就丹砂無上  
藥已超諸數自由身中年道路趨真境外物功名委  
世人今夜空庭香火罷定應星斗識天真

十載從公鬢似蓬羨公英氣老猶克生時別得星辰  
力晚歲仍加鼎竈功世事不堪開眼看勞生漸恐轉  
頭空問公試覓刀圭藥歲歲稱觴此日中

李鈞壽花堂

并叙



尚書郎晉陵李公秉性直而和少從道士得養生法  
未五十去嗜欲老而不衰爲南都通守其西堂北牖  
下池生菖蒲開花三四芬馥可愛以書占之曰此壽  
考之祥也因名其堂曰壽花而余爲作詩記之  
石上菖蒲十二節仙人服之好顏色根如蟠龍不可  
得葉中開花誰復識夫子自少讀道書年未五十嗜  
欲除河流通天非輓轡下入金鼎融爲珠一醉斗酒  
心自如鬼物窺覘驚睚眦菖蒲花開壽之符白髮變  
黑顏如朱它年三朶訪君廬拍手笑我言不虛

次韻子瞻題張公詩卷後

世俗甘枉尺所願求直尋不知一律訛大樂無完音  
見利心自搖慮害安得深至人不妄言淡如朱絲琴  
悲傷感舊俗不類騷人淫又非避世翁閔嘿遽陽瘖  
嘒嘒晨雞鳴豈問晴與陰世人積寸木坐使高樓岑  
晚歲臥草廬誰聽梁甫吟它年楚倚相儻能記惜惜  
次韻廣州陳繹諫議和陳薦宋敏求二龍圖二  
首  
曾送飛龍白日翔未應中路許還鄉鶴歸仍有當年  
伴松老知經幾度霜城下寶坊聊寄榻朝中振鷺舊  
成行相逢出處何須問五嶺清平十月涼



右和彥升寓定力

琳宮清淨思悠哉頗似山林未肯迴五日趨朝真自  
適一樽無事得頻開董狐執筆何時易馬援征蠻未  
遠來奔走安閑誰定是都門攜手一徘徊

右和彥升赴上醴泉

次韻王廷老寄子瞻

歌吹新成百尺臺青山臨水巧崔嵬佳人解作回文  
語狂客能鳴摻鼓雷擷菊傳杯醒復醉採菱盪漿去  
仍回新年聞欲相從飲春酒還須剩作醅

次韻頓起考試徐沂舉人見寄二首

齊楚諸生儼鞞紳人人願得出君門銜枚勇銳驚初  
合棄甲須臾訝許奔細讀未辭燈損目久留終厭棘  
為藩定應親刈翹中楚把卷喧呼半夜言

老年從事忝南京海內交遊尚記名怯見廣場心力  
破厭看細字眼花生新科未暇通三尺舊曲惟知有  
六莖空憶倚樓秋雨霽與君看遍洛陽城

人舉

前舉與頓  
同試西京

送李鈞郎中

君家毗陵本江南雖為浙西終未甘風流秀發自不  
減氣質渾樸猶中含敲榜滿前但長嘯簿書堆案常



清談湖中往往載畫斨竹下小小開茅庵歌吟髣髴  
類騷雅導引委曲師彭聃新茶潑乳睡方覺淥酒傾  
水醒復酣一朝揮手去不顧使我把袂心難堪扁舟  
水涸費牽挽瘦馬雪凍憂朝參一官來往似秋鷺薄  
俸包裹如春蠶東南乞麾尚可得白首誰念家無甌

送文與可知湖州

連持梁洋印久作溪山主深知爲郡樂但畏買茶苦  
來歸天祿閣坐守登聞鼓九重未明入百辟盈庭舞  
城南獨歸臥心事誰當語舊聞吳興勝試問天公取  
家貧橐裝盡歲莫輕帆舉茗溪淨多石弁嶺瘦無土

湖藕雪冰絲山茶潑牛乳香粳飯玉粒鮮鯽鱠紅縷  
宮開水精潔人寄畫屏任俗吏自難堪詩翁正當與  
從來思清絕況乃病新愈團團肘後丹曷曷胃中素  
高臥鎮夸俗清談靜煩訴應笑杜紫微湖亭但狂顧  
次韻王鞏見寄

池上輕冰暖却開迎春送臘仰銜杯君家有酒能無  
事客醉連宵遣不迴詩就滴消盤上蠟信來飄盡嶺  
頭梅商丘冷坐君知否餅罄應須有耻壘

喜雪呈鮮于子駿三首

發函寬大一封書臥閣雍容三日餘旋見雪花投夜



落未應天意與人疎瓦乾浙浙初鳴霰畦潤漸漸想  
沒鉏高會梁園遺勝在早知詞賦似相如

春秋無麥自當書況復秋田水潦餘一雪端來救焦  
槁千箱乞與等親踈消殘溫癘曾非藥蝕遍陳根不  
用鉏猶恐遠村霑未足試呼農圃問何如  
蠶紙鋪庭幾誤書楊花糝逕未春餘積隨平野分高  
下舞信微風作密踈解使遊人似姑射仍令飛鳥變  
春鉏共驚天巧無能學造物無心本亦如

次韻文務光秀才遊南湖

料峭東風助臘寒汀澹白酒借衰顏滿床書卷何曾

讀數步湖光自不閑夢想綠楊垂後浦眼看紅杏照  
前山新春漸好君歸速不見遊人暮不還

湖前小山  
日杏山

予瞻惠雙刀

彭城一雙刀黃金錯刀鏢脊如雙引繩色如青琅玕  
開匣飛電落入手清霜寒引之置膝上凜然愁肺肝  
我衰氣力微覽鏡毛髮斑誓將斬鯨鯢靜此滄海瀾  
又欲戮犀兕永息行路難有志竟不從撫刀但長歎  
投刀淚如霰北斗空闌干歸來刈蓬蒿鉏田植芳蘭  
惜刀不忍用用亦非所便棄置塵土中坐使鋒刃利  
床頭夜生光知有蛟龍蟠慚君贈我意時取一磨看



留守與賓客會開元龍興寺觀燈余有故不預

中夜登南城

燈引雙旌萬點紅傾城車馬在城東使君行樂人人共勸客安眠夜夜同夢想笑談傾滿坐臥聞歌筦逐春風三更試上南樓看無恨繁星十里中

樂城集卷之九

宋西蜀蘇轍子由著

明東吳

王執禮子敬  
顧天叙禮初

全校

詩七十首

春日耕者

陽氣先從土脉知老農夜起飼牛飢雨深一尺春耕利日出三竿曉餉遲婦子同來相嫵媚烏鳶飛下巧追隨紛紜政令曾何補要取終年風雨時

自柘城還府馬上

春色無人見茲行偶衆先柳黃新過雨麥綠稍鋪田



河潤兼冰散禽聲向日圓城池高受霧濶渙暖生煙  
送客情初惡還家意稍便旋聞夫事起已過佛燈然  
簿領何時畢塵埃空自憐南湖漸可到早治木蘭船

次韻子瞻人日獵城西

將賢士氣振令肅軍聲悄晨登戲馬臺一試胡騶裹  
城空巷無人里社轉相曉吾公庶無疾但恐園囿小  
荆榛一焚蕩雉免皆驚矯翩翩白馬將手把青絲挑  
少小事邊微斬刈輕茶蓼殿前賜鞍勒珂月明皎皎  
自言得所事強暴無不了廟筭本詩書下策禁焚燎  
今百鍊剛其就一指繞低回未嘗試坐被世人少

秋霜一朝下凌厲見鷲鳥爲君整驕惰重立穰苴表

送鮮子子駿還朝兼簡花景仁

蜀中耆舊今無幾相逢握手堪流涕勸遊滌倒不還  
家舊俗陵遲真委地錢荒粟帛賤如土權峻茶鹽不  
成市詩書鄉校變古法節行故人安近利欲歸長恐  
歸不得歸去相歡定誰是低徊有似羊觸藩眷戀僅  
同雞擇米中山先生昔所愛南都攝尹私相喜窮冬  
夜長一事無燈火相從夜深睡讀書萬卷老不廢感  
寓百篇深有意俗吏惟知畏簡書窮途豈意逢君子  
春風歸騎忽西顧平日高談應且止朝騎疋馬事朝



謁莫就一床尋夢寐猶有城西范蜀公買地城東種  
桃李花絮飛揚酒滿壺談笑從容詩百紙紅塵暗天  
獨不知白首相看兩無愧古人避世金馬門何必柴  
車返田里

次韻秦觀見寄

東家有賢人西家苦相忽幽蘭委冰霜掩靄特未發  
春風吹芳蕤爛漫安可沒東南信多士人物世不闕  
考槃溪山間自獻耻干謁誰憐幽閒女艷色比南越  
垂耳困鹽車捐金空買骨讀書謝世事閉門動論月  
平生亦羈旅處世常卒卒誰令釣竿手強復此持笏

惟餘七尺軀空洞中無物時蒙好事過解榻聊一拂  
野情樂江海夢想扁舟兀隱居便醉睡世路多顛蹶  
榮華一朝事毀譽百年歇相勸沐咸池陽阿晞汝髮  
次韻道潛見寄

蕭蕭華髮映衰容慙愧高僧歎不逢遊宦終身空處  
處塵埃何日退重重已甘憔悴雞羣鶴猶勝劬勞早  
歲龍回首不堪膏火熱試求甘露洒青松

次韻王鞏元日

庭鵲營巢初一枝餘寒未便夾羅衣春風娜娜還吹  
霰歲事駸駸已發機上國遨遊誰信老中年情味祇



思歸和詩應覺添新懶過盡長空鴈北飛

送將官歐育之徐州

輕衫駿馬走春風未識彭城氣象雄青山只在白門  
外明月盡屬黃樓中五斗濁醪消永日一雙鳴鏑戲  
晴空歸來笑殺幕府客閉戶看書滴滴窮

次韻答王鞏

君家當盛時畫戟擁朱戶中書十八年清明日方午  
形容畫雲閣功業載盟府中庭三槐在遺迹百世睹  
子孫盡豪俊豈類世寒窶胡為久遭厄黽俛受侵侮  
往來兩都間奔走未安土願言解纓紱歸去事農圃

嘉禾根未拔且忍俟甘雨拂衣走東臯此語吾不取  
聊復放襟懷清談對僧麈躬耕未可言知田顧乃父

次韻子瞻過淮見寄兼簡孫奕職方三首

出處平生共江淮恨不來宦遊良誤我老病賦懷哉  
狗物終今世量書盡幾堆歸耕少憂患惟有仰春雷

蜀中謂田無水利者為雷鳴田

其二

龜山昔同到松竹故依然紅印封鹹豉黃罌分井泉  
青天攜杖處晚日落帆偏無限相思意新詩句句傳

其三



行役饒新喜臨川逢故人相看對泉石憐我在埃塵  
會合終多故分張類有神南遊得如願夢想雪溪春

次韻王鞏留別

決策歸田豈世情網羅從此脫餘生請君速治雞黍  
具待我同為沮溺耕秋社相從釀錢飲日高時作叩  
門聲茅廬但恐非君處籍籍朝中望已傾

次韻答孔武仲

白髮青衫不記年相逢一笑慙欣然誦詩疊疊鋸木  
屑展卷駸駸下水船未肯尺尋分枉直日知鑿柄有  
方圓閑官更似揚州學猶得昏昏晝日眠

送傅宏著作歸覲待觀城闕

膠西前輩鄭康成千載遺風及後生舊學詩書儒術  
富兼通法律中能精還家綵服頻為壽得邑河壻喜  
有兵民事近來多迫促弦歌聊試武城聲


律有鄭氏章句

連雨不出寄張恕

麥熟蠶繅熟似烝雨傾三尺未為淫洗清溝澮蚊蚋  
靜沒盡蒲蓮沼沚深遺秉滿田驚朽腐移牀避漏畏  
侵尋高閑祗有張公子臥聽蕭蕭打葉音

和子瞻自徐移湖將過宋都途中見寄五首

東武厭塵土彭門富溪山從兄百日留退食同躋攀





輕帆過百步船底驚雷翻肩輿上南麓眼界涵川原  
愛此忽忘歸願兄且三年我去已怱怱兄來亦崩奔  
永懷置酒地遶郭多雲煙

我昔去彭城明日河流至不見五斗泥但見三竿水  
驚風鬱颯怒跳沫高睥睨湫澗三月餘浮沉一朝事  
分將食魚鼈何暇顧隣里悲傷念遺黎指顧出完壘  
繚堞對連山黃樓麗清泗功成始逾歲脫去如一屣  
空使西楚氓欲語先垂涕

千金築黃樓落成費百金誰言史君侈聊慰楚人心  
秋吐明月白壁懸青岑晃蕩河漢高恍恨窻戶深

邀我三日飲不去如籠禽史君今吳越雖往將誰尋  
欲買爾家田歸種三頃稻因營山前宅遂作泗濱老  
竒窮少成事飽暖未應早願輸橐中裝田家近無報  
平生百不遂今夕一笑倒它年數畝官懸知迫枯槁  
梁園久蕪沒何以奉君遊故城已耕稼臺觀皆荒丘  
池塘塵漠漠鴈鷺空遲留俗衰賓客盡不見枚與鄒  
輕舟舍我南吳越多清流

次韻劉貢父登黃樓懷子瞻二首

青山開四面白水遶三隅野闊時聞籟人閑舊據梧  
畫船留上客遺迹問田夫事少日常飲才疎世未須



决河初荐至勝事偶相俱燕子卑無取滕王遠可樵  
飛濤隱睥睨落日麗浮圖同舍新持節專城敢遠呼  
未遡行部駕已放下淮艫試問登消暑如何楚與吳

吳興有消暑樓

再和

藹藹才名世駸駸日轉禺一時同接浙平昔共棲梧  
攬轡真壯士擁旄良丈夫塵埃脫緇綬水石慰霜須  
勝地來相失清樽未暇俱射餘空見帖鑄罷祗觀撫  
歸計何當决徂年貴早圖檻中終爲食鞴上耻聞呼  
頭我千羊毳平生一釣艫微官不須滿也復試遊吳

陪杜克張恕鴻慶宮避暑

至後雨如瀉晴來熱更多簿書霑汗垢巖石思藤蘿  
賴有祠宮靜時容俗客過老郎無不可公子亦能和  
道勝還相接禪迷屢見訶清凉生絕念煩暑散沉痾  
古木便張幄鳴禽巧當歌桃香呈絳頰瓜熟裹青羅  
飯細經脣滑茶新到腹適劇談時自笑飽食更無它  
適意未應厭後遊真若何官居鄰曲沼田畎助清波  
晚照明疎柳微風響衆荷輕舟尚可載小雨試漁蓑

宋城宰韓秉文惠日鑄茶

君家日鑄山前住冬後茶芽麥粒龕磨轉春雷飛白



雪甌傾錫水散凝酥谿山去眼塵生面簿領埋頭汗  
匝膚一啜更能分幕府定應知我俗人無

次前韻

龍鸞僅比閩團醜鹽酪應嫌北俗龕採愧吳僧身似  
腊點須越女手如酥舌根遺味輕浮齒腋下清風稍  
襲膚七盃未容留客試瓶中數問有餘無

答孔武仲

飛霜委中林不廢長松綠驚風振川野未省勁草伏  
我貧客去盡君來常不速愧君贈桃李永願報瓊玉  
我性本山林苦學筆空秃驕騮塞康莊病足顧難逐

錦文<sub>法</sub>華藻弊褐非所續家有五車書恨不十年讀  
濟南昔相遇我齒三十六談諧傾蓋間還往白首熟  
從君飲濁酒過我飯脫粟西湖多莢薺白晝下鴻鵠  
城西野人居柴門擁修竹後車載鴟夷下馬瀉醜醜  
醉眠臥荒草空洞笑便腹疎狂一如此豈望世收錄  
別來今幾何歸期已屢卜西南有薄田茅舍清溪曲  
耕耘三男子伏膺當自足君能遠相尋布衣巾一幅

送吳思道道人歸吳興二絕

一去吳興十五年東歸父老幾人存惠山唯有錢夫  
子一寸閒田曉日曛



遨遊海上冀逢人  
宴坐山中長閉門  
去住只今誰定  
是相逢一笑各無言

次韻答陳之方祕丞

南山李將軍  
疋馬獨行獵  
田中射虎豹  
後騎不容躡  
丈夫貴自遂  
老大饒驚懾  
飄搖天地間  
自視如一葉  
故人多東南  
願作扁舟涉  
忽蒙長篇贈  
幸此傾蓋接  
時世尚新奇  
詩書存舊業  
南風吹清泚  
西去無停楫  
恨不留君談  
一使衆坐厭  
新詩苦清壯  
欲和再三怯  
東都多名卿  
投刺日盈笈  
一言苟合意  
富貴出旬浹  
行看文石階  
高談曳長袂  
辱贈但茫然  
知君念疲音

登南城有感示文務光王通秀才

幽憂隨秋至  
秋去憂未已  
城南試登望  
百草枯且死  
落葉投人懷  
驚鴻四面起  
所思不可見  
欲往將安至  
斯人定誰識  
顧有二三子  
清風皎冰玉  
滄浪自前洗  
竊脂未嘗穀  
南箕儻微似  
網羅一張設  
投足遂無寄  
田深狡兔肥  
霜降鱸魚美  
造形悼前失  
式微慙往士  
憧憧畝丘道  
歲晚嗟未止  
西山有茅屋  
鉏耰本吾事

張公生日

是歲己未初致仕

少年談王霸  
英氣干斗牛  
中年事軒冕  
徇世仍多憂  
晚歲探至道  
眷眷懷林丘  
今年乞身歸  
始與夙昔酬



高秋過生日真氣茲一周觀心比孤月視世皆浮漚  
表裏一融明萬物不能留顧謂懂懂人斯樂頗曾不  
嗟我本俗士從公十年遊謬聞出世語俛作籠中囚  
俯仰迫憂患欲去安自由問公昔年樂孰與今日優  
山中許道士非復長史儔腹中生梨棗結實從今秋

次韻答張耒

客舟逝將西日夜西北風維舟罷行役坐令鬢如蓬  
偶從二三子步上百尺臺雲煙遍原隰敞悅令人哀  
山中難久居浮沉在城郭欲學楊子雲避世天祿閣  
浮木寄流水行止非所期何須自爲計水當爲我移

外物不可必惟此方寸心心中有樂事手付瑟與琴  
夜吟感秋詩惜此芳物零幽人亦多思起坐再三聽  
白駒在空林銚磬有耻壘盡我一杯酒愁思如雲頽

次王適韻送張耒赴壽安尉二首

綠髮驚秋半欲黃官居無處覓林塘浮生已是塵勞  
侶病眼猶便錦繡章羞見故人梁苑廢夢尋歸路蜀  
山長憐君顧我情依舊竹性蕭疎未受霜

魏紅深淺配姚黃洛水家家自作塘遊客賈生多感  
槩閑官白傅足篇章山分少室雲煙老宮廢連昌草  
木長路出高高應少駐孱顏新過一番霜



次韻張耒見寄

相逢十年驚我老  
 雙鬢蕭蕭似秋草  
 壺將未洗兩脚泥  
 南轅已向淮陽道  
 我家初無負郭田  
 茅廬半破蜀江邊  
 生計長隨五斗米  
 飄搖不定風中煙  
 茹蔬飯糗不願餘  
 茫茫海內無安居  
 此身長似伏轅馬  
 何日還為縱壑魚  
 憐君與我同一手  
 微官骯髒羞牛後  
 請看插版趨府門  
 何似曲肱眠甕牖  
 中流千金買一壺  
 檀中美玉不須沽  
 洛陽榷酒味如水  
 百錢一角空滿盃  
 縣前女几翠欲滴  
 吏稀人少無晨集  
 到官惟有懶相臥  
 看南山春雨濕

次韻王適兄弟送文叔光還陳

三君皆親非復客  
 執手河梁我心惻  
 倚門耿耿夜不眠  
 挽袖忽忽有難色  
 君歸使我勞  
 寃夢落葉鳴塔自相擁  
 君家西歸在新歲  
 此行未遠心先恐  
 故山萬里知何許  
 我欲因君亦歸去  
 清江髣髴釣魚船  
 脩竹平生讀書處  
 青衫白髮我當歸  
 咀噍式微慙古詩  
 少年勿作老人調  
 被服榮名慰所思

次韻張芻諫議燕集

淮陽卧閣生清風  
 梁園坐嘯囹圄空  
 不知何術解醜髡  
 但覺羈客忘樊籠  
 樽壘灑落談笑地  
 塵埃脫去文



書藜清心漸欲無一事少年空記揮千鍾近傳移鎮  
股肱郡復恐入覲明光宮人生聚散不可料一杯相  
屬時方冬浮陽似欲作飛霰想見觀闕瓊花中孝王  
會集猶可繼莫嫌作賦無枚翁

聖民昔知陳州  
余嘗從之遊矣

臘雪五首

長恐冬無雪今朝忽暗空細聲聞軟軟遠勢望濛濛  
濕潤猶兼雨傾斜半雜風豐登解多事歡喜助三農

其二

驕陽不能久密雪自相催急霰初鳴瓦飛花旋集臺  
有人消瘴疫覆麥長根芟欲試樽中物門前問客來

其三

久有歸耕意西山百畝田雪來殊不惡酒熟自相便  
一被簪裳裏長遭羅網牽飛雲迫殘臘愁思渡今年

其四

憂愁不可緩風雪故相撩試問五斗米能勝一束樵  
耕耘終亦飽哺啜定誰邀寒暑不須避傾危且自遙

其五

雪霜何與我憂思自傷神忠信亦何罪才名空誤身  
歸來聊且止老去莫逢嗔樽酒它年事相看醉此辰

次韻王適雪晴復雪二首



驕陽得一雪踰尺應更好晨興視窓隙驚見晴霞杲  
 九衢無停迹狼藉須一掃空餘浩然氣凜凜接清昊  
 餘寒薄虛室一靜解羣燥晨炊晚未供客饋慙草草  
 試脫身上衣行問酒家保孤吟擊槁木大笑稱有道  
 人生但如此富貴何用禱所思獨未見耿耿屬懷抱

其二

同雲自成幄飛雪來無根一為清風卷坐見東方暎  
 重陰偶復合飛霰滿南軒油然青春意已見出土萱  
 老病一不堪惟恃濁酒温開戶理松菊掃蕩無遺痕  
 卷舒朝夕間誰識造化元乾坤本何施中有神怪奔

物極毫末顛倒何足掀老農但知種荷鋤理南園

送呂由庚推官得替還洛中二首

君家相國舊元勳凜凜中丞繼後塵談笑二年同幕  
 府風流一倍愈它人南都去後少佳客西洛歸來多  
 老臣我亦宦遊無久意它年松竹許相鄰

洛水留人一向乾雪泥溢路十分寒送行我豈無樽  
 酒多難君知久鮮歡回首祇應憐老病凌風爭看試  
 輕翰到家定見嵩陽老問我衰遲未解官

崇福宮

四十一歲歲莫日歌



小兒不知老人意賀我明年四十二人生三十百事  
 衰四十已過良可知少年讀書不曉事坐談王霸了  
 不疑脂車秣馬試長道一日百里先自期不知中途  
 有陷穿山高日莫多棘茨長裾大袖足鉤挽却行欲  
 返筋力疲蝮虵當前猛虎後脫身且免克朝饑歸來  
 掩卷淚如雨平生讀書空自誤山中故人一長笑布  
 衣脫粟何所苦古人知非不嫌晚朝來聞道行當返  
 四十一歲不可言四十二歲聊自還

次韻子瞻繫御史獄賦獄中榆槐竹栢

秋風一何厲吹盡山中綠可憐凌雲條化為樵夫束

凜然造物意豈復私一木置身有得地不問直與曲  
 青松未必貴枯榆還自足紛然落葉下蕭條愧華屋

右榆

盛衰日相尋循環何曾歇攀條擘柔荑回首驚脫葉  
 綠槐陰最厚零落今存莢千林一枯槁平地三尺雪  
 草木何足道盈虛視新月微陽起泉下生意未應絕

右槐

故園今何有猶有百竿竹春雷起新萌不放牛羊觸  
 雖無朱欄擁不見紅塵辱清風時一過交戛響鳴玉  
 淵明避紛亂歸嗅東籬菊嗟我獨何為棄此北窻綠



右竹

曲如山下藤脆若溪上葦春風一張王秋霜死則已  
胡爲南澗中辛勤種栢子上枝撓雲霓下根絞石齒  
伐之爲梁棟歲月良晚矣白首閱時人君看柱下史

右栢

次韻子瞻贈張憨子

得罪南來正坐言道人閉口意深全天遊本自有真  
樂昇穀誰知定不賢構火噉噉初吐日飛流袞袞旋  
成川此心此去如灰冷肯更逢人問復然

過龜山

再涉長淮水驚呼十四年龜山老僧在相見一茫然  
僧老不自知我老私自憐驅馳定何獲少壯空已捐  
掉頭不見答笑指岸下船人生何足云陵谷自變遷  
當年此山下莫測千仞淵淵中械神物自昔堯禹傳  
帆檣避石壁風雨隨香煙爾來放冬沐冷沙漲成田  
褰裳六月渡中流一帶牽俯首見砂礫羣漁捕魴鱸  
父老但驚歎此理未易原何況七尺軀不爲物所旋  
衆形要同盡獨有無生全百年爭奪中擾擾誰相賢

放閘二首

畫舫連檣住清流沉閘平忽看銀漢落仍聽夏雷驚



正施遲迴久開頭取次輕滯留初一快奔駛忽如傾  
不識風濤恐聊同枕席行行逢賤魚稻飽食慰平生

其二

閘空非有礙水靜爲誰興開閉偶然異喧逐自不勝  
淵停初鏡淨勢轉忽雲崩脫隘尚容與投深益沸騰  
玉山紛破碎陳馬急侵陵挾版千鈞重浮舟萬斛升  
岸搖將落木魚困或投曾洶湧會誰止蕭條遠欲凝  
力爭知必折少待亦何能一發臨流笑微言早服膺

次韻王適細魚

羣魚一何微僅比毛髮大嬉遊極草草鬢鬣自箇箇  
造物賦羣形偶然如一唾吞舟雖云巨其樂不相過  
若言無性靈還知避船柂

高郵別秦觀三首

濛濛春雨濕邗溝蓬底安眠晝擁裘知有故人家在  
此速將詩卷洗閑愁

筆端大字鴉棲壁袖裏清詩句琢冰送我扁舟六十  
里不嫌罪垢汗交朋

高安此去風濤惡猶有廬山得縱遊便欲攜君解船  
去念君無罪去何求

召伯埭上斗野亭



細雨添春色微風淨煇流但年半今世生計一扁舟  
飲食隨魚蟹封疆入斗牛江波方在眼轉覺此生浮  
次韻鮮于子駿遊九曲池

天高山近海春盡草生池禾黍多新恨川原自昔時  
花存故苑麗樵出舊城隳莫望瓜洲渡曾經駐佛狸

楊州五詠

九曲池

嵇老清彈怨廣陵隋家水調繼哀音可憐九曲遺聲  
盡惟有一池春水深鳳闕蕭條荒草外龍舟想像綠  
楊陰都人似有興亡恨每到殘春一度尋

平山堂

歐陽永叔所建

堂上平看江上山晴光千里對憑欄海門僅可一二  
數雲夢猶吞八九寬簷外小棠陰蔽芾壁間遺墨涕  
沈瀾人亡坐使風流盡遺構仍須子細觀

蜀井

在大明寺

信脚東遊十二年甘泉香稻憶歸田行逢蜀井恍如  
夢試煮山茶意自便短綆不收容鹽濯紅泥仍許置  
清鮮早知鄉味勝為客遊宦何須更着鞭

摘星亭

迷樓舊址

闕角孤高特地迷迷藏渾忘日東西江流入海情無



限莫雨連山醉似泥夢裏興亡應未覺後來愁思蜀  
難齊只堪留作遊觀地看遍峰巒處處低

僧伽塔

山頭孤塔閱真人云是僧伽第二身處處金錢追晚  
供家家蠶麥保新春欲求世外無心地一掃胷中累  
劫塵方丈近聞延老宿清朝留客語逡巡

題杜介供奉熙熙堂

門前籍籍草生徑堂上熙熙氣吐春遮眼圖書聊度  
日放情絲竹最關身年來馮脫烏皮几客去時乾漉  
酒巾卜築城中移榜就休心便作廣陵人

遊金山寄揚州鮮于子駿從事邵光

揚州望金山隱隱大如幞榻來長江上孤高二千尺  
僧居厭山小面面貼蒼石虛樓三百間正壓江潮白  
清風歛霽霧曉日曜金碧直侵魚龍居似得鬼神役  
我行有程度欲去空自惜風吹渡江水山僧午方食  
波瀾洗我心筍蕨飽我腹平生足遊衍壯觀此云極  
鐵甕本誰安海門復誰植東南遞隱見遙與此山匹  
茲遊幾不遂深愧幕府客歸時日已莫正值江月黑  
顧視天水并坐恐星斗濕使君何時罷登覽不可失

初至金陵



山川過雨曉光浮初看江南第一州路繞匡廬更南  
去懸知是處可忘憂

恭

樂城集卷之十

宋 西蜀蘓轍子由 著

明 東吳王執禮子敬 校

詩九十六首

和孔武仲金陵九詠

白鷺亭

白鷺洲前水奔騰亂馬牛亭高疑欲動船去似無憂  
洶湧山方壞澄清練不收中秋誰在此明月滿城頭  
覽輝亭

城裏最高處坡陁見一城山多來有緒江遠靜無聲



歌吹風前度樓臺雨後明風光同楚蜀聊此慰平生

鳳凰臺

鳳鳥久不至斯臺空復高何年種梧竹待地翦蓬蒿  
白水來無際青山轉幾遭南遊且未返江海共滔滔

天慶觀

興廢不可必治城今靜祠松聲聞道路竹色爭軒墀  
江近風雲改亭深草木滋孤墳吊遺直狂閹閔元規

卞壺墓  
在觀側

高齋

金陵佳處自無窮使宅幽深即故宮樓殿六朝遺燼

後江山百里舊城中雨餘尚有金鈿落月出長窺粉

堞空看盡一城懷古地茲遊恨不與君同

此君亭

在華藏寺

綠竹不可數孤亭一倍幽色分巖石潤稍出澗松脩  
雪節寒方見春萌旱不抽故山多此物長恨未歸休

見江亭

在蔣山

江水信浩渺連山巧蔽虧端能上嶮絕故自識津涯  
滅沒檣竿度飄搖鷺羽遲何人倚舟望亦愛此峯危

定林院

定林兩山間崖木生欲合茅屋倚巖隈重重陰清樾



晨齋取旁寺生事信幽絕吾人定何爲常欲依暖熱

八功德水

君言山上泉定有何功德熱盡自清涼苦除卽甘滑  
頗遭遊人病時取破匏挹煩惱雖云消凜然終在臆

遊鍾山

江南四月如三伏北望鍾山萬松碧杖藜試上寶公  
龕衆壑秋聲起相襲青峯回抱石城小白練前橫大  
江直石梯南下俯城闔松徑東蟠轉山谷喬林無風  
聲如雨時見遊僧石上息行窮碧澗一庵巖坐弄清  
泉八功德歸尋晚飯衆山底困卧定林依石壁朝遊

不知澗谷遠莫歸但覺穿雙屐老僧一身泉上住十  
年掃盡人間迹客到惟燒栢子香晨飢坐待山前粥  
丈夫濟時誠妄語白首居山本良策茹蔬飯糗何足  
道純灰洗心聊自滌失身處世足愆尤愧爾山僧少  
憂責

郭祥正國博醉吟庵

姑熟溪頭醉吟客歸作茅庵劣容席團團鵠卵中自  
明窓前月出夜更清醉吟自作溪上語不學擁鼻雜  
陽生詩成付與坐中讀知有清溪可終日作詩飲酒  
聊復同誰來共枕溪中石圓天方地千萬里中與此



間大相似囂然一息不自停水火雷風相滅起直須  
只作此庵看歌罷曲肱還醉眠不用騎鯨學李白東  
入滄海觀桑田

湖陰曲

老虎穴中臥獵夫不敢窺驕驕服箱駝盜驅巡城三  
匝漫不知帳中晝夢日繞壁驚起知是黃須兒馬鞭  
七寶留道左猛士徘徊不能過遺矢如水去已遙明  
日神兵下赤霄荒城至今人不住狐兔驚走風蕭蕭

舟次大雲倉回寄孔武仲

一風失前期十日不相見君帆一何駛去若乘風箭

我舟一何遲出沒蔽葭亂甕中有白糟床上有黃卷  
妻孥不足共思子但長嘆池陽重相遇撫手成一粲  
先行復草草回首空眷眷人生類如此遲速亦何算  
一見誠偶然四海良獨遠相期廬山陰把臂上雲巘

池州蕭丞相樓二首

遶郭青峯睥睨屯入城流水穀文翻樓成始覺江山  
勝人去方知德業尊坐久浮雲霾後嶺酒醒飛雪變  
前村我來邂逅公歸國猶喜登臨共一樽  
丞相風流直至今朱欄仍對舊山林奔馳軒冕終何  
有跌宕圖書意最深松繞城頭風瑟縮江浮山外氣

池守滕元發  
時將解去



陰森三年不起南遷想應有前人識此心

過九華山

南遷私自喜看盡江南山孤舟少僮僕此志還復難  
局促守破窓聯翩過重巒忽驚九華峰高拱立我前  
蕭然九仙人縹緲陵雲烟碧霞爲裳衣首冠青琅玕  
揮手謝世人可望不可攀我行竟草草安能拍其肩  
但聞有高士臥聽松風眠松根得茯苓狀若干歲龜  
煮食一朝盡終身棄腥羶腹背生綠毛輕舉如翔鸞  
相逢欲借問已在長松端何年脫罪罟出處良自便  
芒鞋拄藤杖逢山卽盤桓斯人未可求巖室儻復存

佛池口遇風雨

長江五月多風暴欲行先看風日好此風忽作東南  
來陰雲如湧撥不開驚雷往還轉車轂狂波低昂起  
坑谷中流一葉那復持卷舒已副天公知解帆轉舵  
不容語佛池口中幸可住須臾急雨變昏霾舵師喜  
賀風已回澄溪不動縈白練老木蒼崖蔚葱蒨繫舟  
茅屋得青蔬試問釣船還有魚開樽引滿向妻子明  
日復行未須怖陰陽開闔良等閑扁舟誰令乘嶮艱  
舟次磁湖以風浪留二日不得進子瞻以詩見  
寄作二篇答之前篇自賦後篇次韻



慙愧江淮南北風扁舟千里得相從黃州不到六十  
里白浪俄生百萬重自笑一生渾類此可憐萬事不  
由儂夜深魂夢先飛去風雨對床聞曉鐘

西歸猶未有菟裘擬就南遷買一丘舟楫自能通蜀  
道林泉真欲老黃州魚多釣戶應容貰酒熟鄰翁便  
可留從此莫言身外事功名畢竟不如休

黃州陪子瞻遊武昌西山

千里到齊安三夜語不足勸我勿重陳起遊西山麓  
西山隔江水輕舟亂鳧鷖連峯多回溪盛夏富草木  
杖策看萬松流汗升九曲蒼茫大江湧浩蕩衆山蹙

上方寄雲端中寺倚巖腹清泉類牛乳煩熱須一掬  
縣令知客來行庖映脩竹黃鵝時新煮白酒亦近熟  
山行得一飽看盡千山綠幽懷苦不遂滯念每煩促  
歸舟浪花暝落日金盤浴妻孥寄九江此會難再卜  
君看孫討虜百戰不搖目猶憐江上臺高會飲千斛  
巾冠墮臺下坐使張公哭異時君再來携被山中宿

將還江州子瞻相送至劉郎家狀王生家飲別

相從恨不多送我三十里車湖風雨交  
晉車武子故居其水曰車  
湖松竹相披靡繫舟枯木根會面兩王子嘉眉雖異  
郡鷄犬固猶爾相逢勿空過一醉不須起風濤未可



涉隔竹見奔駛渡江買羔豚收網得魴鯉朝畦甘瓠  
 熟冬盎香醪美烏菱不論價白藕如泥耳誰言百口  
 活仰給一湖水奪官正無賴生事應且爾卜居請連  
 屋扣戶容疑履人生定何為食足真已矣愆尤未見  
 雪世俗多相鄙買田信良計蔬食期沒齒手持一竿  
 竹分子長湖尾

赤壁懷古

新破荊州得水軍鼓行夏口氣如雲千艘已共長江  
 嶮百勝安知赤壁焚觜距方強要一鬪君臣已定勢  
 三分古來伐國須觀釁意突成功所未聞

自黃州還江州

身浮一葉返湓城凌犯風濤日夜行把酒獨斟從臨  
 重還家漸近覺身輕岸回樊口依稀見日出廬山紫  
 翠橫家在庾公樓下泊舟人遙指岸如頰

江州城下土赤如赭

江州五詠

射蛟浦

萬騎巡遊遍千帆破浪輕射蛟江水赤教戰越人驚  
 山轉樓船影岸摧連弩聲祈招無為賦酣寢盡平生

浦上積水相傳漢武教樓船於此

浪井



江波浮陣雲岸壁立青鐵胡為井中泉湧浪時驚發  
水性本無定得止自澄澈誰為女媧手補此天地裂

庾樓

元規情不薄上客有殷生夜半酒將罷公來坐不驚  
舞翻江月迴談落塵毛輕塵世風流盡高樓空此名

東湖

讀書廬山中作郡廬山下平湖浸山脚雲峯對虛榭  
紅蕖紛欲落白鳥時來下猶思隱居勝亂石驚湍瀉

李勃隱居廬山泉石奇勝今樓賢寺其故居也及為九江太守始營東湖風物可愛

琵琶亭

湓江暮雨晴孤舟暝將發夜聞胡琴語展轉不成別  
草堂寄東林雅意存北闕潸然涕泗下安用無生說

不到東西二林

山北東西寺高人永遠師來遊亦前定回首獨移時  
社散白蓮盡山空玄鶴悲何年陶靖節溪上送行遲

遊廬山山陽七詠

開先瀑布

山上流泉自作溪行逢石缺瀉虹霓定知雲外波瀾  
濶飛到峯前本末齊入海明河驚照曜倚天長劍失  
提携誰來卧枕莓苔石一洗塵心萬斛泥



漱玉亭

山回不見落銀潢餘溜喧  
逐響石塘目亂珠璣濺空  
谷足寒雷電繞飛梁入瓶  
銅鼎春茶白接竹齋厨午  
飯香從此出山都不棄滿  
田秔稻插新秧

簡寂觀

山行但覺鳥聲殊漸近神  
仙簡寂居門外長溪淨客  
足山腰苦笋助盤蔬喬松  
定有藏丹處大石仍存拜  
斗餘弟子蒼髯年八十養  
生世世授遺書

歸宗寺

來聽歸宗早晚鐘疲勞懶  
上紫霄峯墨池漫疊溪中

石白塔微分嶺上松佛宇  
爭推一山甲僧厨坐待十

方供欲遊山北東西寺巖  
谷相連更幾重此寺王逸  
少所置云

有墨池  
在焉

萬杉寺

萬木青杉一手栽滿堂白  
佛九天來仁宗初年有僧  
手種萬杉特為

建此寺仍以  
禁中佛賜之涓涓石溜供  
厨足蠹蠹山屏遶寺開半

榻松陰秋簟冷一杯香飯  
午鐘催安眠飽食平生事

不待山僧喚始廻

三峽石橋

三峽波濤飢泝沿過橋雷  
電記當年江聲髣髴瞿唐



口石角參差灑瀕前應有夜猿啼古木已將秋葉作  
歸船老僧未省遊巴蜀松下相逢問信然

白鶴觀

五老相携欲上天玄猿白鶴盡疑仙浮雲有意藏山  
頂流水無聲入稻田古木微風時起籟諸峯落日盡  
生烟歸鞍草草還城市慙愧幽人正醉眠

南康阻風遊東寺

欲涉彭蠡湖南風未相許扁舟厭搖蕩古寺慰行旅  
重湖面南軒驚浪卷前浦霏微雪陣散顛倒玉山舞  
一風輒九日未悉土囊怒百里斷行舟仰看飛鴻度

故人念征役一飯語平素竹色淨飛濤松聲亂秋雨  
我生足憂患十載不安處南北已兼忘遲速何須數

寄題陳憲郎中竹軒

家有脩篁綠滿軒趨庭詩禮舊忘言凌霜自得良朋  
友過雨時添好子孫試剪輕筠扶野步旋收涼葉煮  
清樽風流共道勝桑梓鄰里何妨種百根

次韻孔武仲到官後見寄

舉楫同千里繫舟時一言共嗟蓬作屋願就席爲門  
行役身先困征商思益昏僅同登壘斷何止服車轅

次韻筠守毛維瞻司封觀脩城三首



北垣荆棘舊成堆留待公來次第開車馬已通城下  
路榛蕪盡付冶家灰異時碧瓦千門合應記紅旌百  
度來自笑禪謔便曠野肩輿飛蓋許追陪  
撥棄案頭文字堆曉晴山色四門開究懷民事老雖  
壯俛首山城心已灰荆棘燒殘桑柘出狐狸去盡犬  
鷄來規模先遣通蹊隧後乘應容衆客陪  
山脚侵城起阜堆遶城微道斬新開闔闔半壞驚潮  
信隍壑初深見劫灰蟻聚千夫會幾日鱗差萬瓦看  
將來史君才力輕山郡朝論行聞急召陪

次子瞻夜字韻作中秋對月二篇一以贈王郎

二以寄子瞻

平明坐曹黃昏歸終歲得閑惟有夜已邀明月出墻  
東更遣清風掃庭下城上青鬟四山合門前白練長  
江瀉誰家高會吹參差鄰婦悲歌春罷亞二年憂患  
今已過一夜清光天所借西京詩句出蘓李南國風流  
數王謝已隨孤棹去中原肯顧新科求上舍讀書本  
自比嵇鍛學劍要須問曹蕙清觴灑灑君莫違佳句  
駸駸予已怕狂夫猖狂終累人不返行遭親黨罵  
十年秋月照相思相從祇有彭門夜露侵笳鼓思城  
闕寒迫魚龍舞潭下厭厭夜飲歡自足落落襟懷向



入瀉秋深河來巨野溢水乾樓起滕王亞北海孔公  
雖好客河內寇尹那得借是非朝野忽紛紜得喪芳  
菲一開謝明月多情還入門流水何知空繞舍晨餐  
江市富鱸鮐夜宿山村足梨蔗坐隅鵬鳥不須問墻  
外蝮蛇猶足怕婁公見唾行自乾馮老尚多誰定罵

次韻王適食茅栗

相從萬里試南餐對案長思首宿盤山栗滿籃兼白  
黑村醪入口半甜酸久聞牛尾何曾試竊比雞頭意  
未安故國霜蓬如益大夜來彈劍似馮驩

過毛國鎮夜飲

風格照人華省郎江山遶郭古仙鄉湯傳鉛鼎八百  
歲未比金釵十二行不動歌聲人已醉旋聞詩句夜  
初長簿書撥盡知餘力道院清虛頃未嘗

次韻毛國鎮趙景仁唱和三首一贈毛一贈趙

一自詠

治劇從容緩策銜鈴軒無事日清談隼旗畫戟明千  
里紙帳繩床自一菴金奏屢陳容客和玉山不動看  
賓酣我來邂逅逢寬政忘却漂流身在南  
一紙新詩過雁銜醒然何異接君談奉親魚蟹兼臨  
海退食棊書定有菴一別經年真似夢多憂不飲亦



如酣共君友契非今日蔽帝棠陰自劍南  
遠謫江湖舳尾銜到來辛苦向誰談畏人野鶴長依  
嶺厭事山僧祇住菴黃雀頓來成一飽白醪新熟喜  
初酣踈頑近日尤堪笑坐任飄風去自南

再和三首

穴鼠何須窺數銜麤官不用苦高談夜傾綠蟻風吹  
竹晝擁黃紬雪覆菴每作微詞還自笑偶漸餘潤亦  
成酣公詩精絕非倫擬自古騷人盡在南

燕窠泥土一春銜慙愧封侯止立談舊隱尚聞存竹  
徑歸休但要葺茅菴釣船夢想沿溪泛酒盞遙思向

日酣強欲遲留依幕府吳公行恐召河南

天教窮困欲誰銜生事那須一一談自笑豐年麀滿  
甕不堪雨後菌生菴士師憔悴經三黜陶令幽憂付  
一酣他日歸耕苦相憶尺書頻寄北山南

次韻王適州學新修水閣

黃鍾巨挺兩春容何幸幽居近學宮坐對江山增浩  
氣力追齊魯欲同風頌詩聞道求何武家法行看試  
左雄欲伴少年遊矍相奔軍慚愧恐詞窮

次韻毛君九日

山脚侵城盡是臺登高處處喜崔嵬手拈霜菊香無



柰向拂江風酒自開幕府尊壘雲裏集民家歌吹靜  
中來定知勝却陶彭澤悵望籬邊白日頽

次韻毛君感事書懷

種棠經歲便成科秋雨調勻氣漸和才力有餘嫌事  
少風情無限覺詩多長松更老仍添節古井雖深自  
不波宴坐山房人豈識一尊聊且慰蹉跎

次韻毛君見督和詩

新詩落紙一城傳顧我踈蕪豈足編他日杜陵詩集  
裡韋迢畧見兩三篇

次韻毛君山房遣興

欲就陽崖暖新開石磴斜誰言太守宅自是野人家  
燕坐收心鑑冥觀闕界沙退公長寂寞外物自喧譁  
缺逕移松補斜陽種竹遮白雲生後礎孤鶩伴殘霞  
破悶時尋鶴呼眠亦任鴉喜聞槽出甕屢問菊開花  
古井元依斗丹砂舊養芽虬蟬頻上案猿狖巧分樞  
客到扁舟遠年侵兩鬢華心搖挂風旆眼暗隔輕紗  
強撥橫肱睡來從插版衙隱居慙棄擲勝地每咨嗟  
頑鈍終何取彫磨豈復加焦先夙所尚園舍恰如蝸

和胡教授蒙太守策試諸生

著籍初同闕里多采芹先致魯風和欲將大策觀胸



膽盡召中堂列雁鵝終日正言何忌諱幾人餘力尚  
委蛇豈惟太守知爲政仍見先生善設科

和毛君州宅八詠

鳳凰山

山川蟠踞偶成形威鳳低回久未行更種梧桐真可  
致高飛性似伯夷清

披仙亭

仙翁舊住蜀江邊千歲歸來一鶴翩城郭已非人事  
改淒涼遺迹但披仙

方沼亭

池上茅簷覆水低早來秋雨尚虹霓敗荷折葦飛鴻  
下正憶漁舟泊故溪

翠樾亭

一夜飛霜點綠苔曉庭黃葉掃成堆簷間翠樾彫疎  
盡却放墻東好月來

李八百洞

洞府山川百里賒洞門藤蔓鎖烟霞神仙不與人間  
異弟妹還應共一家

煉丹井

鑿井燒丹八百年塵緣消盡果初圓石床薜蘿人安



在綠水團團一片天

磨劍池

神仙鑄劍本無礪岸古班班尚鐵銑天上少年仍狡  
獪不須還爾對方平

山房

岸幘携筇夜夜來蒲團紙帳竹香臺直須覓取僧爲  
伴更爲開菴斲草萊

次韻毛君病中菊未開

病肺秋深霧雨傷舊繒故絮喜清涼菊花金粟未曾  
生桂酒鵝兒空自黃草木亦知年有閏風霜漸近月

方陽

十月爲陽月

得詩聞道維摩病欲到毘耶言已忘

雨中宿酒務

微官終日守糟缸風雨淒涼夜渡江早歲謬知儒術  
貴安眠近喜壯心降夜深唧唧醉鳴甕睡起蕭蕭葉  
打窓阮籍作官都爲酒不須分別恨南邦

次韻毛君經旬不用鞭朴

共喜秋深酒味醇官曹休假不須旬政寬境內棠陰  
合訟去庭中草色新不惜牛刀時一割已因鼯鼠發  
千鈞歲終誰爲公書考豈止江西第一人

次韻李撫辰屯田修州門



六月江濤壁壘頽倉崖翠甃就新臺咄嗟雙闕還依  
舊咫尺羣山信有材畫戟風生兩衙退飛橋日出萬  
人來不因毀圯催興築誰見雍容治劇才

飲酒過量肺疾復作

朝蒙麴塵居夜傍糟床卧鼻香黍麥熟眼亂瓶罌過  
囊中衣已空口角涎虛墮啜嘗未云足盜醕恐深坐  
使君信寬仁高會慰寒餓西樓適新成明月猶半破  
擁簷青山橫拂檻流水播雕槃貯霜實銀盞薦秋糯  
共言文字歡豈待紅裙佐惟知醍醐滑不悟頗羅大  
夜歸肺增漲晨起脾失磨情懷忽牢落藥餌費調和

衰年足竒窮一醉仍坎坷清尊自不惡多病欲何奈  
聞公話少年舉白不論箇歌吟雜嘲謔笑語爭掀簸  
平明起相視銳氣曾未挫達人遺形骸駑馬懷豆莖  
不知逃世網但解憂歲課不見獨醒人終費招魂些

衢州趙閱道少師濯纓亭

挂冠纓上已無塵猶愛溪光碧照人點檢舊遊黃石  
在掃除諸念白鷗親一尊父老囊金盡三逕松筠生  
事貧他日南公數人物丹青添入縣圖新

茶花二首

黃蘗春芽大麥麩傾山倒谷採無餘久疑殘枿陽和



盡尚有幽花霰雪初耿耿清香崖蔴淡依依秀色嶺  
 梅如經冬結子猶堪種一畝荒園試為鉏  
 細嚼花鬚味亦長新芽一粟葉間藏稍經臘雪侵肌  
 瘦旋得春雷發地狂開落空山誰比數烝烹來歲最  
 先嘗枝枯葉硬天真在踏遍牛羊未改香

次韻毛君山房卽事十首

案牘稀疎意自閑夜闌幽夢曉方回青苔紅葉騷人  
 事時見詩筒去又來

東晉仙人借舊山定應天意許公閒郡人欲問史君  
 笑指峯巒紫翠間

聖知秋候時鳴壁香礙蒲簾不出門隱几無言心有  
 得南窓晴日暖侵軒

溪山付與醉中仙美酒何曾斗十千就得江邊賤魚  
 稻閑官未用苦相憐

忘身先要解忘名分別須臾起不平請看早朝霜入  
 履何如卧聽打衙聲

禽哢秋來不復圓桐陰霜後亦成穿黃花強欲招酣  
 飲白髮偏工報老年

邂逅清歡屢不期病來無奈羽觴飛醉乘籃輦江邊  
 去長伴漁舟月下歸



醉裡題詩偏韻惡秋來勸酒益杯深不才多病俱非  
敵綠綺緣何得報金

庵中獨宿雨垂垂永夜無人欵竹扉  
灰冷銅爐香欲滅床頭一點葛燈微

觸事隨緣不用多華堂玉食奈憂何  
美人未厭山阿陋薜荔為裳帶女蘿

再和十首

澗草巖花日日開江南秋盡似春回  
旋開還落無人顧惟有山峰暖尚來

江上孤城面面山居人也自不曾閑  
蜂遊蟻聚知何事日夜長橋南北間

城郭村墟共水雲  
檉籬竹屋映柴門  
隱居亦有高人在岸  
憤無言倚釣軒

一官疎散自疑仙  
三考應成醉日千  
早病固須閑地著  
多憂長被達人憐

養生尤復要功圓  
溜滴南溪石自穿  
近見牢山陳道士  
微言約我更三年

牢山陳道士瑛近過此叩之竟無所云約三年當再見  
張公詩社見公名  
公昔與張伯達為唱和之友  
白首山城嘆不平

坐客要聞新樂府  
應須湔口琵琶聲  
高情日與故山期  
鴻鵠誰言也倦飛  
且聽漁人強嘯



啜坐中羈客畏公歸

天為多才故欲禁府門  
摧落漲江深鼎新翠壁排精  
鐵湧出飛樓直百金

樓上青山遠四垂畫橋百步引  
朱扉落成當與公同  
上一看長江白練微

歌舞留賓意自多華燈數問夜  
如何白頭病客無才  
思憤卧茅簷長薜蘿

筠州二詠

牛尾狸

目如狸尾如牛攀條捷嶮如  
猱猴橘柚為漿栗為餽

筋肉不足惟膏油深居簡出  
善自謀尋踪發窟并執  
囚蓄租分散身為羞松薪瓦甑  
蒸浮浮壓入糟盎肥  
欲流熊肪羊酪真比儔引筋  
將舉訊何尤無功竊食  
人所仇

黃雀


秋風下黃雀飛禾田熟黃雀肥  
羣飛蔽空日色薄  
逡巡百頃禾為稀翾翻巧捷多  
且微精丸妙繳舉輒違  
乘時席勢不可揮一朝風雨寒  
霏霏肉多翅重天時  
非農夫舉網驚合圍懸頸系足  
膚無衣百箇同金仍  
相依頭顱萬里行不歸  
北方居人厭羔豨咀噍聊發



樂城集

一笑歛

卷之三  
七  
依也頁十



清夢軒



